

Markus

Nabi Yahya

¹ Inilah permulaan Injil tentang Isa al-Masih, Putera Allah,

² Seperti yang tersurat dalam nubuat Nabi Yasyaya:

‘Lihatlah, Aku akan menghantar utusan-Ku untuk mendahului-Mu,

dialah yang akan menyediakan jalan bagi-Mu’

³ ‘satu suara berseru di gurun,

“Sediakanlah jalan bagi Tuhan,

luruskanlah jalan bagi-Nya.” ’

⁴ Demikianlah Yahya muncul di gurun, mengimadkan orang dan mengkhabarkan firman – bertaubatlah dan datanglah untuk diimadkan, supaya Allah mengampunkan dosamu.

⁵ Ramailah orang yang datang dari Yudea dan Baitulmaqdis untuk mendengar kata-kata Yahya. Mereka mengakui dosa mereka lalu Yahya mengimadkan mereka di Sungai Yordan.

⁶ Yahya berpakaian yang dibuat daripada bulu unta dengan tali pinggang daripada kulit. Makanannya belalang dan madu gurun.

⁷ Inilah beritanya: ‘Seorang yang lebih besar daripada ku akan datang selepasku. Tali kasut-Nya pun tidak layak kuurai.

⁸ Aku mengimadkanmu dengan air, tetapi Dia akan mengimadkanmu dengan Roh Suci.’

Yahya mengimadkan Isa

⁹ Kemudian Isa datang dari Nasaret di Galilea, lalu diimadkan oleh Yahya di Sungai Yordan.

¹⁰ Ketika Isa keluar dari sungai itu, Dia melihat langit terbuka dan Roh Suci seperti burung merpati turun hinggap ke atas-Nya.

¹¹ Lalu kedengaran suara dari syurga: 'Engkaulah Putera-Ku yang Kukasihi dan dengan-Mu Aku berkenan.'

¹² Lantas, Roh Suci memimpin Isa ke gurun.

¹³ Isa di situ selama empat puluh hari dan digoda oleh Iblis serta dikelilingi binatang liar. Para malaikat datang melayani-Nya.

Pengikut Isa yang pertama

¹⁴ Setelah Yahya dipenjarakan, Isa pergi ke Galilea lalu mengkhabarkan Injil daripada Allah.

¹⁵ Isa berkata, 'Sudah genap masanya dan kerajaan Allah hampir tiba. Bertaubatlah dan percayalah akan Injil ini!'

¹⁶ Ketika Isa sedang berjalan di pinggir Laut Galilea, Dia terpandang dua orang nelayan, Simon dan saudaranya Andreas, sedang menjala ikan.

¹⁷ Isa berkata kepada mereka, 'Ikutlah Aku. Aku akan menjadikan kamu penjala insan.'

¹⁸ Mereka terus meninggalkan jala mereka dan mengikut-Nya.

¹⁹ Sejurus berjalan, Isa melihat dua orang lagi adik-beradik, bernama Yakobus dan Yahya, anak Zebedeus. Mereka sedang duduk mengemaskan jala di dalam perahu.

²⁰ Isa terus memanggil mereka. Kedua-dua beradik itu meninggalkan bapa mereka dengan orang gajinya di dalam perahu, lalu mengikut Isa.

Isa membentak roh durjana

²¹ Isa dan pengikut-pengikut-Nya tiba di Kapernaum. Pada hari Sabat berikutnya, Isa masuk ke saumaah lalu mengajar.

²² Semua yang mendengar-Nya kagum kerana Dia mengajar dengan penuh kewibawaan, berbeza dari guru-guru Taurat.

²³ Ketika itu seorang yang dirasuk roh durjana berada di saumaah. Dia berseru:

²⁴ 'Apa yang hendak Kaubuat kepada kami, hai Isa orang Nasaret? Adakah Engkau hendak membinasakan kami? Aku tahu siapa Engkau. Engkau Yang Suci daripada Allah!'

²⁵ Isa membentak roh itu, 'Diam! Keluar daripada orang ini!'

²⁶ Roh durjana itu menggoncang-goncang tubuh orang yang dirasuknya lalu keluar sambil menjerit.

²⁷ Hal ini menyebabkan semua orang tercengang lalu berbisik sesama sendiri, 'Adakah ini suatu ajaran baru? Dia memerintah roh-roh durjana dengan penuh kuasa dan mereka menurut kata-Nya.'

²⁸ Dengan demikian, khabar tentang Isa segera tersebar ke seluruh Galilea.

Isa menyembuhkan ramai orang

²⁹ Isa dan pengikut-Nya, termasuk Yakobus dan Yahya, keluar dari saumaah itu lalu ke tempat kediaman Simon dan Andreas.

³⁰ Ibu mertua Simon sedang demam terbaring di tempat tidur. Setibanya Isa di situ, Dia diberitahu tentang hal itu.

³¹ Isa menghampiri ibu mertua Simon, memegang tangannya dan menolongnya bangun. Demam wanita itu hilang lalu dia melayani mereka.

³² Apabila malam menjelang, semua orang sakit dan orang yang dirasuk roh iblis dibawa kepada Isa.

³³ Semua penduduk kota berhimpun di hadapan rumah itu.

³⁴ Isa menyembuhkan ramai orang daripada pelbagai penyakit. Dia juga menghalau roh-roh iblis sambil memerintahkan mereka diam kerana mereka tahu siapa Dia.

Isa mengajar di kota-kota lain

³⁵ Keesokannya, pada waktu subuh, Isa bangun lalu pergi ke luar kota ke suatu tempat yang sunyi untuk berdoa.

³⁶ Simon dan rakan-rakannya pergi mencari Isa.

³⁷ Setelah menjumpai-Nya, mereka berkata: 'Semua orang sedang mencari-Mu!'

³⁸ Isa berkata, 'Kita mesti ke kota-kota lain di negeri ini supaya Aku dapat menyebarkan Injil di sana. Kerana tujuan inilah, maka Aku datang.'

³⁹ Lalu Isa menjelajah ke serata Galilea, mengajar di saumaah dan menghalau roh-roh iblis.

Isa menyembuhkan seorang yang sakit kusta

⁴⁰ Seorang yang menghidap penyakit kusta datang kepada Isa lalu berlutut meminta

pertolongan-Nya. Katanya, 'Jika Engkau mahu, Engkau dapat mentahirkanku.'

⁴¹ Isa berbelas kasihan lalu menghulurkan tangan-Nya menyentuh orang itu sambil berkata, 'Aku mahu. Tahirlah!'

⁴² Pada saat itu juga orang itu ditahirkan daripada penyakit kusta.

⁴³ Isa menyuruhnya pergi dengan memberi satu peringatan keras:

⁴⁴ 'Dengar baik-baik. Jangan beritahu sesi-apa pun hal ini. Tetapi pergi kepada imam, kemudian persembahkan korban sebagaimana diperintahkan oleh Musa, sebagai bukti kepada mereka bahawa kamu benar-benar sudah ditahirkan.'

⁴⁵ Tetapi orang itu menyebarkan hal itu merata-rata dan terus-menerus, sehingga Isa tidak dapat masuk ke bandar terang-terangan. Isa tinggal di luar kota di tempat-tempat yang lengang, namun orang dari pelbagai kawasan datang kepada-Nya.

2

Isa menyembuhkan seorang lumpuh

¹ Beberapa hari kemudian, Isa pulang ke Kaper-naum dan tersebarlah khabar itu.

² Ramailah orang datang berhimpun di rumah tempat Dia tinggal itu, sehingga penuh sesak sampai ke pintu. Isa pun menyampaikan firman kepada mereka.

³ Datanglah empat orang mengusung seorang yang lumpuh.

⁴ Oleh sebab kesusahan itu, mereka tidak dapat membawanya kepada Isa. Oleh itu mereka membuka bumbung rumah betul-betul di atas tempat Isa berada lalu menurunkan orang lumpuh yang terbaring di atas tikar.

⁵ Melihat iman mereka yang begitu teguh, Isa berkata kepada orang lumpuh itu, 'Anak-Ku, dosamu telah diampunkan.'

⁶ Guru-guru Taurat yang duduk di situ berkata dalam hati,

⁷ 'Lancangnya dia mengkufuri Allah! Tiada siapa boleh mengampunkan dosa kecuali Allah!'

⁸ Tetapi Isa segera mengetahui dalam roh-Nya bahawa mereka berfikir demikian lalu berkata, 'Mengapa kamu berfikir begitu?'

⁹ Manakah yang lebih mudah dikatakan: "Dosamu telah diampunkan," atau, "Bangun, angkat tikarmu dan berjalanlah"?

¹⁰ Tetapi supaya kamu tahu bahawa di bumi ini Putera Insan berkuasa mengampunkan dosa... Berkatalah Dia kepada orang lumpuh itu,

¹¹ 'Aku berkata kepadamu, bangun, angkat tikarmu, dan pulanglah.'

¹² Di hadapan mata mereka semua, orang lumpuh itu bangun, mengangkat tikarnya lalu segera berjalan ke luar. Semua orang di situ kehairanan lalu memuji Allah. Mereka berkata, 'Belum pernah kami lihat kejadian begini!'

Panggilan Lewi

¹³ Isa pergi lagi ke pinggir laut. Ramai orang datang kepada-Nya lalu Dia mengajar mereka.

¹⁴ Ketika Isa berjalan di situ, Dia terpancang seorang pemungut cukai bernama Lewi anak Alfeus sedang duduk di tempat kerjanya. Isa berkata kepadanya, 'Ikutlah Aku,' lalu Lewi bangun mengikut-Nya.

¹⁵ Selepas itu Isa makan di rumah Lewi. Ramai pemungut cukai dan 'orang berdosa' mengikut Isa dan ramai antara mereka turut makan bersama Isa serta para pengikut-Nya.

¹⁶ Apabila hal ini dilihat oleh sebilangan guru Taurat daripada golongan Farisi, mereka bertanya kepada para pengikut Isa: 'Mengapa dia makan bersama pemungut cukai dan "orang berdosa"?'

¹⁷ Isa mendengar pertanyaan itu lalu menjawab, 'Orang sakitlah yang memerlukan tabib, bukannya orang sihat. Aku datang bukan untuk memanggil orang yang benar, tetapi orang berdosa.'

Berpuasa

¹⁸ Pada suatu masa ketika para pengikut Yahya Pengimad dan pengikut orang Farisi berpuasa, beberapa orang datang kepada Isa lalu bertanya, 'Pengikut Yahya Pengimad dan pengikut orang Farisi sedang berpuasa, mengapa pengikut-Mu tidak?'

¹⁹ Isa menjawab, 'Adakah tetamu di majlis jamuan kahwin berpuasa? Tentu tidak, selagi pengantin lelaki masih bersama mereka, tidaklah mereka berpuasa.'

²⁰ Tetapi akan tiba saatnya pengantin lelaki dibawa pergi meninggalkan mereka. Ketika itulah mereka berpuasa.

²¹ ‘Tiada siapa menggunakan kain baru untuk menampal pakaian lama, kerana kain baru itu akan mengecut dan semakin koyaklah pakaian lama.

²² Begitu juga, tiada siapa menuangkan air anggur yang baru ke dalam bekas kulit yang lama. Kalau dilakukan, air anggur baru akan memecahkan bekas lama, dan kedua-duanya terbuang. Air anggur baru mesti dituangkan ke dalam bekas yang baru.’

Isa dan hari Sabat

²³ Pada suatu hari Sabat, Isa dan para pengikut-Nya berjalan melalui ladang gandum. Para pengikut-Nya mula memetik beberapa tangkai bijirin gandum.

²⁴ Sebilangan orang Farisi berkata kepada Isa, ‘Lihatlah, para pengikutmu melanggar hukum Taurat pada hari Sabat!’

²⁵ Isa menjawab, ‘Tidakkah kamu membaca apa yang dilakukan oleh Daud semasa dia dan anak buahnya kekurangan dan kelaparan?’

²⁶ Dia masuk ke khemah Allah sewaktu Abiatar berjawat sebagai Imam Besar lalu makan roti persembahan, meskipun perbuatan itu dilarang kerana hanya imam dibenarkan makan roti itu. Daud juga memberikan roti itu kepada mereka yang ada bersamanya.’

²⁷ Isa menambah, ‘Hari Sabat diwujudkan untuk manusia, bukannya manusia diwujudkan untuk hari Sabat.

²⁸ Jadi Putera Insan juga Junjungan atas hari Sabat.’

3

¹ Kemudian Isa kembali ke saumaah. Di situ ada seorang yang lumpuh sebelah tangannya.

² Ada beberapa orang yang ingin mencari alasan untuk membuat tuduhan terhadap Isa. Mereka memerhatikan dengan teliti sama ada Dia akan menyembuhkan orang itu pada hari Sabat.

³ Isa berkata kepada orang yang lumpuh sebelah tangannya itu, 'Berdiri, marilah ke depan.'

⁴ Kemudian Dia menyoal orang di situ, 'Manakah yang boleh kita lakukan pada hari Sabat: berbuat baik atau jahat? Menyelamatkan atau membinasakan orang?' Tetapi semuanya berdiam diri.

⁵ Isa memandang orang di sekeliling-Nya dengan rasa marah dan amat dukacita dengan mereka yang begitu keras kepala. Lalu Dia berkata kepada orang yang lumpuh sebelah tangannya itu, 'Hulurkan tanganmu.' Orang itu pun menghulurkan tangannya yang lumpuh, tangan itu terus sembuh.

⁶ Orang Farisi keluar dari situ lalu segera berpakat dengan beberapa anggota golongan Herodes untuk membunuh Isa.

Orang ramai mengikut Isa

⁷ Isa beredar ke laut bersama pengikut-pengikut-Nya. Ramai orang Galilea datang kepada-Nya. Ada yang dari Yudea,

⁸ Baitulmaqdis, Idumea, seberang Sungai Yordan, dan sekitar Tirus dan Sidon. Mereka datang berduyun-duyun kerana mendengar segala yang telah dilakukan-Nya.

⁹ Begitu ramainya orang sehingga Isa menyuruh pengikut-Nya menyediakan perahu untuk-Nya supaya Dia tidak terhimpit.

¹⁰ Ramai orang telah disembuhkan-Nya. Oleh itu, orang sakit berebut-rebut hendak menyentuh-Nya.

¹¹ Apabila orang yang dirasuk roh-roh durjana melihat-Nya, mereka sujud di hadapan-Nya lalu berseru, 'Engkau Putera Allah.'

¹² Isa melarang keras mereka mengatakan siapa Dia.

Isa memanggil dua belas rasul

¹³ Kemudian Isa naik ke bukit. Dia memanggil semua orang yang dikehendaki-Nya lalu mereka datang kepada-Nya.

¹⁴ Isa memilih dua belas orang antara pengikut-Nya itu untuk menyertai-Nya dan untuk diutus-Nya memberitakan Injil

¹⁵ serta dikurniai kuasa untuk menghalau roh-roh iblis.

¹⁶ Dua belas orang yang dipilih-Nya itu ialah: Simon (yang juga dipanggil-Nya Petrus);

¹⁷ Yakobus dan saudaranya Yahya iaitu anak-anak Zebedeus (dua orang adik-beradik ini digelar-Nya Boanerges, yang bermakna Anak Petir);

¹⁸ Andreas, Filipus, Bartolomeus, Matius, Tomas, Yakobus anak Alfeus, Tadeus, Simon orang Patriot

¹⁹ dan juga Yudas Iskariot yang kelak mengkhianati-Nya.

Isa dan Beelzebul

²⁰ Selepas itu Isa masuk ke sebuah rumah, tetapi begitu ramainya orang yang datang berkumpul semula sehingga Isa dan pengikut-pengikut-Nya tidak sempat makan.

²¹ Apabila keluarga Isa mendengar perkara ini, mereka juga datang untuk mengambil-Nya apabila mendengar orang berkata, 'Dia tidak siuman.'

²² Sebilangan guru Taurat dari Baitulmaqdis berkata, 'Dia dirasuk Beelzebul! Dengan kuasa penghulu roh iblis Dia menghalau roh-roh iblis.'

²³ Oleh itu Isa memanggil semua orang itu lalu bercakap melalui beberapa ibarat: 'Bagaimana Iblis dapat menghalau Iblis?'

²⁴ Kalau satu kerajaan berpecah belah, kerajaan itu tidak dapat bertahan.

²⁵ Dan jika keluarga berpecah belah, keluarga itu akan hancur.

²⁶ Dan jika Iblis berontak melawan dirinya sendiri dan berpecah belah, dia tidak dapat bertahan; sudah sampailah saat kemusnahannya.

²⁷ Tiada siapa dapat memasuki rumah seorang yang gagah dan merampas hartanya, kecuali orang gagah itu dapat diikatnya dahulu.

²⁸ Ingatlah: Segala dosa dan kata kufur manusia dapat diampunkan.

²⁹ Tetapi sesiapa yang mengkufuri Roh Suci tidak akan diampunkan; dia bersalah kerana berbuat dosa kekal.'

³⁰ Isa berkata demikian kerana ada orang berkata, 'Dia dirasuk roh durjana.'

Isa dan saudara-saudara-Nya

³¹ Apabila ibu dan saudara-saudara Isa tiba, mereka menanti di luar dan menyuruh orang memanggil-Nya.

³² Pada waktu itu, orang ramai duduk di sekeliling Isa berkata kepada-Nya, 'Lihatlah! Ibu dan saudara-saudara-Mu ada di luar. Mereka memanggil Engkau.'

³³ Isa menjawab, 'Siapakah ibu-Ku? Siapakah saudara-saudara-Ku?'

³⁴ Dia memandang semua orang yang duduk di sekeliling-Nya lalu berkata, 'Lihat, inilah ibu dan saudara-saudara-Ku!'

³⁵ Sesiapa yang melakukan kehendak Allah, dialah saudara lelaki, saudara perempuan, dan ibu-Ku.'

4

Ibarat tentang seorang penabur

¹ Isa mula mengajar lagi di pinggir laut. Begitu ramainya orang datang berasak-asak di sekeliling-Nya sehingga Dia terpaksa duduk di dalam sebuah perahu di laut itu manakala orang ramai berdiri di pantai.

² Isa mengajar mereka banyak perkara melalui ibarat. Dalam ajaran-Nya itu, Dia berkata:

³ 'Dengarlah! Seorang peladang pergi menabur benih.

⁴ Semasa dia menabur benih, ada yang jatuh di jalan, lalu habis dimakan burung.

⁵ Ada yang jatuh di tempat yang berbatu dan kurang tanahnya. Benih itu cepat tumbuh kerana tanahnya tidak dalam.

⁶ Tetapi ketika matahari naik, tunas-tunas itu layu lalu kering kerana tidak mempunyai akar.

⁷ Ada pula yang jatuh di tengah semak berduri, lalu semak membesar dan membantutkannya sehingga tidak berbuah.

⁸ Tetapi ada benih yang jatuh di tanah subur lalu bertunas, membesar dan berbuah, hasilnya tiga puluh, enam puluh atau seratus kali ganda.'

⁹ Lalu kata-Nya, 'Jika kamu bertelinga, dengarlah.'

¹⁰ Ketika Isa bersendirian, dua belas pengikut-Nya dan beberapa orang yang ada bersama-Nya menanya Dia erti ibarat itu.

¹¹ Isa berkata kepada mereka, 'Kamu telah diberi anugerah untuk mengetahui rahsia kerajaan Allah. Tetapi orang luar akan mendengarnya melalui ibarat,

¹² supaya

“Mereka terus melihat tetapi tidak nampak,
mereka terus mendengar
tetapi tidak faham;

kerana sekiranya mereka mengerti,
mereka akan bertaubat dan diampuni!” ’

¹³ Kemudian Isa bertanya kepada mereka, 'Jika kamu tidak memahami ibarat itu, bagaimanakah kamu dapat mengerti ibarat yang lain?

¹⁴ Peladang itu menabur firman.

¹⁵ Ada orang seperti benih di jalan, tempat firman itu ditabur. Sebaik-baik mereka mendengar firman, datanglah Iblis untuk mengambil firman yang sudah ditabur di dalam hati mereka.

¹⁶ Ada orang lain seperti benih yang ditabur di tempat berbatu. Mereka mendengar firman itu dan segera menerimanya dengan sukacita,

¹⁷ tetapi akarnya tidak dalam di hati, maka tidak tahan lama. Apabila orang itu menanggung kesusahan atau penganiayaan kerana firman itu, mereka segera berpaling.

¹⁸ Ada yang lain seperti benih yang ditabur di tengah semak berduri. Mereka mendengar firman itu,

¹⁹ tetapi kerunsingan tentang hidup, tarikan palsu harta benda dan aneka kemahuan lain membantutkan firman itu sehingga tidak berbuah.

²⁰ Dan yang lain seperti benih yang ditabur di tanah subur. Mereka mendengar dan menyambut firman itu lalu mendatangkan hasil: tiga puluh, enam puluh atau seratus kali ganda.'

Ibarat tentang pelita

²¹ Isa berkata pula, 'Pernahkah orang memasang pelita lalu meletakkannya di bawah pasu atau katil? Tentu diletakkannya di atas kaki pelita.

²² Yang tersembunyi akan dinyatakan, yang dirahsiakan akan didedahkan.

²³ Jika kamu bertelinga, dengarlah.'

²⁴ Selepas itu Isa berkata, 'Perhatikan apa yang kamu dengar. Ukuran yang kamu gunakan untuk mengukur akan digunakan terhadapmu, malah lebih berat lagi.

²⁵ Sesiapa yang ada sesuatu akan diberi lebih banyak lagi; tetapi sesiapa yang tidak ada,

sedikit yang ada padanya pun akan diambil daripadanya.’

Ibarat tentang benih yang tumbuh

²⁶ Isa berkata seterusnya, ‘Kerajaan Allah ibarat seorang yang menabur benih di ladangnya.

²⁷ Malam dia tidur, siang dia bekerja. Benih itu terus-menerus tumbuh dan membesar. Dia tidak faham bagaimana hal itu terjadi.

²⁸ Tanahlah yang menumbuhkan tanaman hingga berbuah – mula-mula pucuk, kemudian bulir, akhirnya buah.

²⁹ Setelah masak, buahnya dituai oleh orang itu kerana musim menuai telah tiba.’

Ibarat tentang biji sesawi

³⁰ ‘Bagaimanakah kerajaan Allah?’ kata Isa lagi. ‘Apakah ibarat yang dapat digunakan untuk menjelaskannya?’

³¹ Keadaannya seperti biji sesawi yang ditabur di tanah, iaitu benih terkecil di dunia.

³² Tetapi apabila ditabur, benih itu tumbuh dan menjadi tumbuhan yang terbesar. Dahannya begitu rimbun sehingga burung membuat sarang di bawah keteduhannya.’

³³ Dengan banyak ibarat yang semacam itu Isa mengajar tentang firman kepada mereka, setakat yang dapat mereka faham.

³⁴ Dia tidak berkata-kata kepada mereka tanpa ibarat. Tetapi apabila Dia sendirian dengan para pengikut-Nya, Dia menerangkan segala-galanya.

Angin ribut diredakan

³⁵ Pada petang itu juga, Isa berkata kepada para pengikut-Nya, 'Marilah kita pergi ke seberang sana.'

³⁶ Ketika itu Isa di dalam perahu. Para pengikut-Nya meninggalkan orang ramai itu di pantai lalu belayar bersama-Nya. Ada beberapa perahu lain yang belayar bersama-sama.

³⁷ Lalu angin bertiup kencang dan ombak melanda perahu sehingga hampir dipenuhi air.

³⁸ Ketika itu Isa sedang tidur di bahagian belakang perahu, kepala-Nya beralaskan bantal. Para pengikut-Nya mengejutkan Dia lalu berkata, 'Tuan Guru, tidakkah Engkau peduli? Kita hampir karam!'

³⁹ Isa bangun lalu memarahi angin dan berkata kepada ombak, 'Diam! Tenanglah!' Angin pun reda dan laut menjadi tenang.

⁴⁰ Kemudian Isa berkata kepada para pengikut-Nya, 'Mengapa kamu begitu takut? Mengapa kamu masih tidak percaya?'

⁴¹ Mereka berasa gerun lalu berkata sesama sendiri, 'Siapakah Dia ini? Angin dan ombak pun taat kepadanya!'

5

Isa menyembuhkan seorang yang dirasuk roh iblis

¹ Lalu sampailah mereka di seberang laut, di daerah Gerasa.

² Sebaik-baik Isa turun dari perahu, seorang lelaki yang kerasukan roh durjana keluar dari perkuburan lalu menemui-Nya.

³ Orang itu tinggal di kawasan perkuburan. Tiada siapa terdaya mengikatnya lagi, meskipun dengan rantai.

⁴ Berkali-kali dia dirantai dan dibelenggu, tetapi dapat diputuskannya rantai itu dan dipatahkannya belenggu itu. Tiada seorang pun dapat menguasainya.

⁵ Siang malam dia merayau di perkuburan dan di bukit, sambil menjerit-jerit dan mencederakan badannya dengan batu.

⁶ Dari jauh dia melihat Isa lalu lari mendekatinya dan sujud di hadapan-Nya.

⁷ Orang itu berseru dengan suara keras, 'Hai Isa, Putera Allah Yang Maha Tinggi, apa urusan-Mu dengan aku? Demi Allah, jangan seksa aku!'

⁸ Kerana sebelumnya Isa berkata kepadanya, 'Roh durjana, keluarlah kamu daripada orang ini!'

⁹ Kemudian Isa bertanya kepadanya, 'Siapa namamu?'

Orang itu menjawab, 'Legion, kerana kami ini ramai sekali.'

¹⁰ Dia memohon sungguh-sungguh kepada Isa supaya tidak menghalau mereka keluar dari kawasan itu.

¹¹ Berdekatan tempat itu ada kawanan babi yang sedang mencari makan di lereng bukit.

¹² Roh-roh iblis itu memohon kepada Isa, 'Suruhlah kami pindah ke babi itu, biarlah kami masuk ke dalam tubuh babi itu.'

¹³ Isa bersetuju, lalu roh-roh durjana itu keluar dan masuk ke dalam tubuh kawanan babi itu. Kesemua babi itu, kira-kira dua ribu ekor, terjun dari tepi cenuram ke dalam laut lalu mati lemas.

¹⁴ Penjaga-penjaga babi itu lari lalu menyebarkan berita itu di bandar dan di desa. Para penduduk pun keluar hendak melihat apa yang telah terjadi.

¹⁵ Mereka menghampiri Isa lalu melihat orang yang tadinya dirasuk roh iblis yang banyak itu, kini duduk diam, sudah berpakaian dan ternyata siuman. Mereka semua pun ketakutan.

¹⁶ Semua yang telah menyaksikan kejadian itu menceritakan segala-galanya tentang orang yang kerasukan roh iblis dan kawanannya itu.

¹⁷ Oleh itu mereka meminta Isa meninggalkan daerah itu.

¹⁸ Ketika Isa menaiki perahu, orang yang tadinya dirasuk roh iblis itu memohon kepada-Nya, supaya dia dibenarkan menyertai-Nya.

¹⁹ Tetapi Isa tidak membenarkan, sebaliknya berkata, 'Pulanglah kepada keluargamu, kepada orang sekampungmu. Beritahu mereka betapa besarnya pertolongan Tuhan bagimu dan bagaimana Dia telah berbelas kasihan pada kamu.'

²⁰ Orang itu pun mula menjelajahi daerah sepuluh kota dan menceritakan segala yang telah dilakukan oleh Isa untuknya. Mereka semua kehairanan.

Isa melakukan mukjizat dan penyembuhan

²¹ Setelah itu, Isa kembali menyeberang laut dengan perahu. Setiba-Nya di pantai sebelah sana, Dia dikerumuni orang yang ramai sekali.

²² Datanglah Yairus, seorang ketua saumaah di situ. Ketika dia melihat Isa, dia sujud di hadapan-Nya

²³ dan merayu, 'Anak perempuanku sakit tenat, hampir mati. Tolonglah datang, letakkan tangan-Mu padanya, supaya dia sembuh dan dapat terus hidup.'

²⁴ Isa pun pergi bersama Yairus.

Begitu ramainya orang yang mengikut Isa sehingga Dia diasak dari semua pihak.

²⁵ Di situ ada seorang wanita yang sudah dua belas tahun menghidap penyakit pendarahan.

²⁶ Dia telah menghabiskan segala hartanya untuk dirawat oleh ramai tabib tetapi tidak sembuh, semakin parah keadaannya.

²⁷ Wanita itu telah banyak mendengar tentang Isa. Oleh itu, dia masuk ke tengah-tengah orang ramai itu dan mendekati Isa dari belakang lalu menyentuh jubah-Nya.

²⁸ 'Kiranya dapat kusentuh jubah-Nya,' kata wanita itu, 'tentu aku akan sembuh.'

²⁹ Dengan serta-merta pendarahannya berhenti. Dia merasakan dirinya sudah sembuh.

³⁰ Pada saat itu Isa sedar ada kuasa yang telah keluar daripada-Nya lalu Dia bertanya, 'Siapa yang menyentuh jubah-Ku?'

³¹ Para pengikut-Nya berkata, 'Lihatlah orang beresak-asak di sekeliling Engkau. Bagaimana Engkau boleh bertanya siapa yang menyentuh-Mu?'

³² Tetapi Isa memandangi sekeliling-Nya, mencari orang yang telah menyentuh-Nya itu.

³³ Wanita itu mengetahui apa yang telah terjadi kepada dirinya. Dia gementar ketakutan, lalu tampil dan sujud kepada Isa serta menceritakan segala-galanya.

³⁴ Isa berkata kepadanya, 'Hai anak-Ku, imanmu telah menyembuhkan kamu. Pergilah dengan sejahtera dan sembuhlah daripada penyakitmu.'

³⁵ Sedang Isa berkata-kata itu, beberapa orang pesuruh datang daripada keluarga ketua saumaah dan memberitahu Yairus, 'Anak perempuan tuan sudah meninggal. Usahlah tuan susahkan Tuan Guru lagi.'

³⁶ Isa tidak menghiraukan kata-kata itu. Dia berkata kepada Yairus, 'Jangan takut, percaya saja.'

³⁷ Lalu Isa tidak membenarkan siapapun mengikut-Nya kecuali Petrus, Yakobus dan Yahya, saudara Yakobus.

³⁸ Apabila tiba di rumah Yairus, Isa melihat keadaan yang kelam-kabut dan mendengar ratap tangis yang kuat.

³⁹ Isa masuk lalu berkata kepada mereka, 'Mengapa kelam-kabut dan menangis? Anak itu tidak mati, cuma tidur.'

⁴⁰ Tetapi mereka mentertawakan Isa.

Setelah menyuruh mereka semua keluar, Isa mengajak ibu bapa anak itu dan pengikut-pengikut-Nya masuk ke bilik tempat anak itu terbaring.

⁴¹ Isa memegang tangan anak itu lalu berkata kepadanya, '*Talitha kum!*' (maksudnya, 'Anak perempuan, Aku berkata kepadamu, bangunlah!').

⁴² Anak perempuan yang berusia dua belas tahun itu segera bangkit lalu berjalan. Mereka semua sungguh kagum.

⁴³ Tetapi dengan tegas Isa melarang mereka memberitahu sesiapa tentang perkara itu, lalu menyuruh mereka memberi anak itu makan.

6

Isa mengajar di Nasaret

¹ Isa beredar dari situ lalu pulang bersama para pengikut-Nya ke kampung halaman-Nya.

² Pada hari Sabat Dia mula mengajar di saumaah. Jemaah di situ hairan mendengar ajaran Isa.

‘Dari manakah Dia memperoleh semua ini?’ tanya mereka. ‘Apakah kebijaksanaan yang ada pada-Nya? Bagaimanakah Dia dapat melakukan mukjizat?’

³ Bukankah Dia ini tukang kayu, anak kepada Maryam, saudara kepada Yakobus, Yoses, Yudas dan Simon? Bukankah saudara-saudara perempuan-Nya tinggal di sini?’ Oleh itu mereka enggan menerima-Nya.

⁴ Isa berkata kepada mereka, ‘Seorang nabi dihormati di mana-mana kecuali di kampung halamannya, di antara sanak-saudaranya dan di dalam keluarganya sendiri.’

⁵ Dia tidak dapat melakukan satu mukjizat pun di situ. Dia hanya menyembuhkan beberapa orang sakit dengan meletakkan tangan-Nya pada mereka.

⁶ Dia sungguh hairan bahawa mereka tidak percaya.

Isa mengutus dua belas pengikut-Nya

Selepas itu, Isa pergi ke kampung-kampung di sekitar itu dan mengajar.

⁷ Dia memanggil pengikut-Nya yang dua belas itu, lalu mengutus mereka berdua-dua, serta memberi mereka kuasa atas roh-roh durjana.

⁸ Perintah-Nya kepada mereka demikian: 'Jangan bawa apa-apa dalam perjalanan, kecuali sebatang tongkat – roti pun jangan, beg pun jangan, wang dalam ikat pinggang pun jangan.

⁹ Pakailah capal, tetapi sehelai baju sahaja.'

¹⁰ Isa berkata lagi, 'Apabila kamu disambut di sesebuah rumah, tinggallah di situ hingga kamu beredar dari kota itu.

¹¹ Sebaliknya, jika penduduk sesuatu kota enggan menerimamu atau mendengar kata-katamu, pergilah dari situ dan kebaskan debu daripada tapak kakimu sebagai kesaksian terhadap mereka.'

¹² Pengikut Isa yang dua belas itu pun pergi menyampaikan berita bahawa manusia harus bertaubat.

¹³ Mereka menghalau banyak roh iblis, dan menyapukan minyak pada ramai orang sakit serta menyembuhkan mereka.

Nabi Yahya dibunuh

¹⁴ Raja Herodes mendengar tentang kejadian itu, kerana nama Isa sudah terkenal di mana-mana. Ada orang berkata, 'Yahya Pengimad sudah hidup semula! Itulah sebabnya dia ini berkuasa melakukan mukjizat.'

¹⁵ Yang lain berkata, 'Dia ini Ilyas.'

Ada pula yang berkata, 'Dia ini nabi, seperti nabi zaman dahulu.'

¹⁶ Ketika mendengar hal demikian, Herodes berkata, 'Dia itu Yahya yang kepalanya telah kupancung, tetapi dia hidup semula!'

¹⁷ Ini kerana memang Herodes telah memberikan perintah supaya Yahya ditangkap, diikat dan dipenjarakan. Herodes berbuat demikian kerana Herodias, isteri kepada saudaranya Filipus, yang telah dikahwininya.

¹⁸ Yahya pernah menegur perbuatan Herodes itu, 'Tuanku bersalah mengahwini isteri saudara sendiri.'

¹⁹ Akibatnya Herodias menaruh dendam terhadap Yahya dan ingin membunuhnya, tetapi hasratnya terhalang,

²⁰ sebab Herodes takut akan Yahya. Herodes tahu Yahya seorang yang benar dan suci, oleh itu dia melindungi Yahya. Herodes juga suka mendengar kata-kata Yahya, meskipun kata-kata itu membuatnya sangat gelisah.

²¹ Akhirnya Herodias mendapat peluang apabila Raja Herodes mengadakan jamuan hari jadinya untuk semua pegawai tinggi kerajaan, panglima dan tokoh masyarakat Galilea.

²² Anak gadis Herodias menari dan menghiburkan Herodes serta tetamunya.

Oleh itu raja berkata kepada gadis itu, 'Mintalah daripadaku apa saja yang kamu ingini dan akan kuberikan kepadamu.'

²³ Dia menyambung dengan sumpah, 'Apa sahaja yang kamu minta akan kuberi kepadamu, walau separuh kerajaanku sekalipun.'

²⁴ Gadis itu pergi bertanya kepada ibunya, 'Apakah yang patut kuminta?'

Jawabnya, ‘Kepala Yahya Pengimad.’

²⁵ Gadis itu segera kembali kepada raja dan berkata, ‘Aku mahu kamu beri kepadaku kepala Yahya Pengimad di atas talam sekarang juga.’

²⁶ Lalu raja amat berdukacita, tetapi apakan daya, dia telah bersumpah di hadapan semua tetamunya.

²⁷ Dia pun memberikan perintah kepada askar supaya membawakan kepala Yahya. Askar itu pergi ke penjara lalu memancung kepala Yahya.

²⁸ Dia membawa kepala itu di atas talam dan menyerahkannya kepada gadis itu. Lalu gadis itu menyerahkan kepala Yahya kepada ibunya.

²⁹ Apabila para pengikut Yahya mendengar perkara itu, mereka datang dan mengambil jenazah Yahya lalu mengebumikannya.

Isa memberi makan kepada lima ribu orang

³⁰ Kemudian rasul-rasul kembali berkumpul dengan Isa dan melaporkan segala yang telah mereka lakukan serta ajarkan.

³¹ Orang yang datang dan pergi di situ begitu ramainya sehingga Isa dan para pengikut-Nya tidak sempat makan. Oleh itu, Isa berkata kepada para pengikut-Nya, ‘Marilah ke tempat yang sunyi supaya kita dapat bersendirian, dan berehat sebentar.’

³² Mereka pun bertolak dengan perahu ke tempat yang sunyi.

³³ Tetapi pada waktu mereka bertolak ramai orang melihat dan mengenal mereka. Orang dari semua kota berlari ikut jalan darat supaya sampai

di tempat yang dituju itu sebelum Isa dan para pengikut-Nya.

³⁴ Apabila Isa turun dari perahu dan melihat orang ramai di situ, hati-Nya penuh belas kasih kerana mereka seperti domba tanpa gembala. Dia pun mula mengajarkan banyak perkara kepada mereka.

³⁵ Ketika hari sudah petang, para pengikut Isa datang kepada-Nya dan berkata, 'Hari sudah hampir malam dan tempat ini terpencil.'

³⁶ Suruhlah semua orang ini pergi supaya mereka ke pekan atau ke kampung yang berdekatan untuk membeli makanan.'

³⁷ Tetapi Isa menjawab, 'Kamu berilah mereka makan.'

Para pengikut-Nya bertanya, 'Haruskah kami pergi membeli roti berharga dua ratus dinar untuk memberi mereka makan?'

³⁸ Isa bertanya, 'Pergilah lihat berapa banyak roti yang ada pada kamu.'

Setelah mereka memeriksanya, mereka berkata, 'Lima buku roti dan dua ekor ikan.'

³⁹ Isa mengarahkan mereka supaya menyuruh semua orang di situ duduk berkelompok-kelompok di atas rumput.

⁴⁰ Mereka pun duduk dalam kelompok; ada yang seratus orang sekelompok dan ada yang lima puluh orang.

⁴¹ Setelah Isa mengambil lima buku roti dan dua ekor ikan itu, Dia menengadah ke langit dan mengucapkan syukur. Lalu Dia memecah-mecahkan roti itu dan menyerahkannya kepada para pengikut-Nya untuk diberikan kepada orang ramai itu. Dia

membahagikan juga dua ekor ikan itu kepada mereka semua.

⁴² Setiap orang makan sehingga kenyang.

⁴³ Selepas itu para pengikut-Nya mengumpulkan lebihan makanan roti dan ikan sebanyak dua belas bakul.

⁴⁴ Jumlah orang lelaki yang makan itu kira-kira lima ribu orang.

Isa berjalan di atas air

⁴⁵ Isa segera mengarahkan para pengikut-Nya pergi dahulu dengan perahu ke Betsaida di seberang laut sementara Dia menyuruh orang ramai itu pulang.

⁴⁶ Setelah mereka pergi, Isa naik ke bukit untuk berdoa.

⁴⁷ Apabila hari sudah malam, perahu para pengikut Isa sudah sampai ke tengah laut sedangkan Isa seorang diri di darat.

⁴⁸ Isa melihat para pengikut-Nya bersusah payah mendayung perahu kerana angin bertiup dari arah bertentangan. Kira-kira menjelang subuh, Isa berjalan di atas air menghampiri mereka. Dia hendak mendahului mereka.

⁴⁹ Tetapi ketika mereka terpancang Dia berjalan di atas air, mereka menyangka-Nya hantu lalu mereka berteriak-teriak.

⁵⁰ Mereka ketakutan melihat Isa.

Tetapi Dia segera berkata kepada mereka, 'Tabahkan hatimu! Aku Isa. Jangan takut.'

⁵¹ Dia naik ke perahu mereka, lalu angin pun teduh. Para pengikut-Nya hairan tercengang.

⁵² Mereka masih belum mengerti apa sebenarnya yang berlaku dengan roti itu, kerana hati mereka masih keras.

⁵³ Mereka menyeberang hingga tiba di Gene-saret. Di situ mereka menambat perahu itu.

⁵⁴ Sebaik-baik mereka turun dari perahu, orang mengenal Isa

⁵⁵ lalu berlari ke serata kawasan dan mem-bawakan orang sakit yang terbaring di atas tikar kepada-Nya di mana-mana sahaja Dia berada.

⁵⁶ Di setiap tempat yang dikunjungi-Nya – baik di kota, di pekan atau di kampung – penduduk di situ membawa orang yang sakit ke pasar-pasar. Mereka memohon agar sekurang-kurangnya Isa membenarkan orang sakit itu menyentuh jubah-Nya. Semua yang menyentuhnya terus sembuh.

7

Adat istiadat nenek moyang

¹ Orang Farisi dan beberapa guru Taurat yang datang dari Baitulmaqdis berkumpul di keliling Isa.

² Mereka melihat beberapa pengikut Isa makan dengan tangan yang ‘tidak suci’, iaitu tangan yang tidak dibasuh.

³ (Orang Farisi malah semua orang Yahudi taat mengikut adat istiadat nenek moyang mereka. Mereka tidak akan makan sebelum membasuh tangan menurut cara-cara yang ditentukan.

⁴ Apabila pulang dari pasar, mereka juga tidak akan makan sebelum membersihkan diri. Banyak lagi peraturan yang diamalkan oleh

mereka, seperti hal membasuh cawan, kendi, dan bekas tembaga.)

⁵ Oleh itu, orang Farisi dan guru Taurat di situ bertanya kepada Isa, ‘Mengapakah pengikutmu tidak menurut adat istiadat nenek moyang kita? Mengapakah mereka makan dengan tangan yang “tidak suci”?’

⁶ Isa menjawab, ‘Tepat sekali kata-kata Nabi Yasyaya dalam nubuatnya tentangmu, hai orang munafik; seperti yang tersurat:

“Bangsa ini menghormati-Ku

dengan kata-kata,

tetapi hati mereka jauh daripada-Ku.

⁷ Sia-sialah mereka menyembah-Ku;

sedangkan ajaran yang mereka

ajarkan ialah peraturan manusia.”

⁸ ‘Kamu mengetepikan perintah Allah untuk menurut adat istiadat manusia.’

⁹ Isa berkata lagi: ‘Kamu sungguh pandai menyingkirkan perintah Allah untuk menegakkan adat istiadatmu sendiri!

¹⁰ Musa menyampaikan perintah ini, “Hormatilah ibu bapamu” dan “Orang yang mencaci ibu bapa sendiri mesti dihukum mati.”

¹¹ Tetapi kamu memberikan ajaran berikut: Jika seseorang berkata kepada ibu bapanya, “Segala apa yang harus kugunakan untuk membantu ayah dan emak, sudah kujadikan korban” (iaitu telah dipersembahkan kepada Allah),

¹² maka orang itu tidak perlu menolong ibu bapa.

¹³ Jadi, adat istiadat yang kamu sampaikan membatalkan firman Allah. Banyak lagi perkara sedemikian yang kamu lakukan.'

¹⁴ Isa memanggil orang ramai itu dan berkata kepada mereka, 'Kamu semua, dengarlah supaya kamu faham.

¹⁵ Apa yang masuk dari luar ke dalam seseorang tidak dapat menjiskannya. Apa yang keluar daripada seseorang itulah yang menjiskannya.

¹⁶ Jika kamu bertelinga, dengarlah!'

¹⁷ Setelah Isa meninggalkan orang ramai itu dan masuk ke rumah, para pengikut-Nya bertanya kepada-Nya tentang maksud ibarat itu.

¹⁸ Isa berkata kepada mereka, 'Kamu ini sama dengan mereka. Tidakkah kamu faham bahawa apa yang masuk dari luar ke dalam seseorang tidak dapat menjiskannya?

¹⁹ Kerana sesuatu itu tidak masuk ke hatinya tetapi ke dalam perutnya, kemudian keluar semula.' (Dengan demikian Dia menyatakan semua makanan halal.)

²⁰ Kata-Nya lagi: 'Apa yang keluar daripada seseorang itu menjiskannya

²¹ kerana dari dalam, dari hati manusialah timbul fikiran jahat yang mendorong seseorang berfikiran durjana, berbuat cabul, mencuri, membunuh,

²² berzina, tamak, berdendam, menipu, mengeluarkan kata-kata lucu, bermata jahat, dengki, mengkufuri Allah, berlagak sombong, dan bersikap bodoh.

²³ Semua perkara jahat ini timbul dari dalam hati dan itulah yang menjiskan seseorang.'

Iman seorang perempuan Siro-Fenisia

²⁴ Kemudian Isa pergi dari situ ke kawasan berdekatan kota Tirus, lalu masuk ke sebuah rumah. Dia tidak mahu orang tahu Dia ada di situ tetapi Dia tidak dapat menyembunyikan diri.

²⁵ Ibu kepada seorang anak perempuan yang dirasuk roh durjana telah mendengar tentang Isa lalu segera datang kepada-Nya dan sujud di hadapan-Nya.

²⁶ Wanita itu seorang Yunani, dia berasal dari daerah Fenisia di Siria. Dia memohon Isa menghalau roh iblis yang merasuk anaknya.

²⁷ Isa menjawab, 'Anak-anak harus diberi makan dahulu. Tidak patut makanannya diambil untuk dilemparkan kepada anjing.'

²⁸ 'Benar, Tuan,' jawab wanita itu, 'tetapi anjing di bawah meja pun makan sisa yang dijatuhkan oleh anak-anak.'

²⁹ Maka Isa berkata kepadanya, 'Kerana jawapanmu itu, pulanglah. Roh iblis sudah keluar daripada tubuh anakmu.'

³⁰ Apabila ibu itu pulang ke rumah, dia mendapati anaknya sedang berbaring di katil dan tidak lagi dirasuk roh iblis.

Isa menyembuhkan seorang bisu tuli

³¹ Selepas itu Isa meninggalkan daerah Tirus, meneruskan perjalanan ke Laut Galilea melalui Sidon, ke tengah-tengah daerah Sepuluh Kota.

³² Di sana seorang bisu tuli dibawa kepada-Nya dengan permohonan agar Isa meletakkan tangan padanya.

³³ Isa membawanya ke samping, jauh daripada orang ramai itu, lalu memasukkan jari-Nya ke dalam kedua-dua belah telinga orang itu. Kemudian Dia meludah dan menyentuh lidah orang itu.

³⁴ Selepas itu Dia menengadah ke langit lalu menarik nafas panjang dan berkata kepada orang itu, '*Effata!*' (ertinya "Terbukalah!").

³⁵ Serta-merta telinga orang itu terbuka dan lidahnya pulih, lalu dia bertutur dengan baik.

³⁶ Isa melarang semua yang hadir menceritakan hal itu kepada sesiapa pun. Tetapi semakin Isa melarang, semakin mereka menceritakannya.

³⁷ Mereka sungguh hairan dan berkata, 'Dia melakukan segala-galanya dengan baik sekali. Dia membolehkan orang tuli mendengar dan orang bisu berkata-kata.'

8

Isa memberi makan kepada empat ribu orang

¹ Pada suatu hari, ketika orang tersangat ramai berhimpun dan kehabisan makanan, Isa memanggil para pengikut-Nya lalu berkata,

² 'Aku kasihan kepada orang ramai ini, sudah tiga hari mereka bersama-Ku, dan sekarang mereka kehabisan makanan.'

³ Kalau Kusuruh mereka pulang dengan perut kosong, mereka akan pengsan di tengah jalan kerana ada yang datang dari jauh.'

⁴ Para pengikut Isa menjawab, 'Di tempat terpencil ini, di mana hendak dicari makanan yang cukup untuk semua orang ini?'

⁵ Isa bertanya kepada mereka, 'Berapa banyakkah roti yang ada padamu?'

'Tujuh buku,' jawab mereka.

⁶ Isa menyuruh orang ramai itu duduk di atas tanah. Dia mengambil tujuh buku roti itu dan mengucap syukur. Setelah itu Dia memecah-mecahkan roti itu dan menyerahkannya kepada para pengikut-Nya untuk dihidangkan, dan mereka pun memberikannya kepada orang yang banyak itu.

⁷ Mereka juga ada beberapa ekor ikan kecil. Setelah mengucap syukur atasnya, Isa menyuruh supaya ikan itu dibahagi-bahagikan juga.

⁸ Kesemua orang pun makan sehingga kenyang. Sisa lebihan makanan yang dikumpulkan sebanyak tujuh bakul penuh.

⁹ Bilangan mereka itu kira-kira empat ribu orang. Isa pun menyuruh mereka pulang.

¹⁰ Selepas itu Isa terus menaiki perahu bersama para pengikut-Nya pergi ke daerah Dalmanuta.

¹¹ Beberapa orang Farisi datang kepada Isa dan mula bersoal jawab dengan-Nya untuk memerangkap-Nya. Untuk menduga-Nya, mereka meminta daripada-Nya suatu tanda ajaib dari syurga.

¹² Isa mengeluh lalu menjawab, 'Mengapakah orang zaman ini mencari suatu tanda ajaib? Sesungguhnya Aku berkata kepadamu, tidak akan diberikan tanda apapun kepada orang zaman ini.'

¹³ Isa meninggalkan mereka dan kembali ke perahu lalu ke seberang.

Ragi orang Farisi dan ragi Herodes

¹⁴ Para pengikut Isa terlupa membawa roti yang mencukupi. Di dalam perahu itu cuma ada se-buku roti.

¹⁵ Isa mengingatkan mereka, 'Berhati-hatilah dengan ragi orang Farisi dan ragi Herodes.'

¹⁶ Kemudian mereka membincangkannya satu sama lain dan berkata, 'Dia berkata begitu kerana kita tidak membawa roti.'

¹⁷ Isa mengetahui apa yang mereka bincangkan lalu Dia bertanya, 'Mengapa kamu memperbincangkan hal tidak membawa roti? Tidakkah kamu tahu dan faham lagi? Begitu tumpulkah fikiranmu?

¹⁸ Kamu ada mata, tidakkah kamu melihat? Kamu ada telinga, tidakkah kamu mendengar? Tidakkah kamu ingat

¹⁹ bagaimana Aku memecah-mecahkan lima buku roti untuk lima ribu orang? Berapa bakul lebih makanan yang kamu kumpulkan?'

'Dua belas,' jawab mereka.

²⁰ 'Dan apabila Aku memecah-mecahkan tujuh buku roti untuk empat ribu orang, berapa bakul lebih makanan yang kamu kumpulkan?'

'Tujuh,' jawab mereka.

²¹ Lalu Isa berkata kepada mereka, 'Kamu masih belum faham lagi?'

Isa menyembuhkan seorang buta

²² Isa dan para pengikut-Nya tiba di Betsaida. Beberapa orang membawa seorang buta kepada Isa dan memohon agar Dia menyentuhnya.

²³ Isa memegang tangan orang buta itu lalu memimpinnya ke luar dari pekan itu. Isa meludahi mata orang buta itu. Kemudian Dia meletakkan tangan-Nya pada orang itu lalu bertanya, 'Adakah kamu melihat apa-apa?'

²⁴ Orang itu memandang ke hadapan lalu berkata, 'Aku nampak orang, rupa mereka seperti pokok berjalan.'

²⁵ Sekali lagi Isa meletakkan tangan-Nya pada mata orang itu. Setelah orang itu berusaha untuk melihat, kali ini penglihatannya cukup terang dan matanya telah sembuh.

²⁶ Isa pun menyuruhnya pulang sambil berkata, 'Jangan masuk lagi ke pekan itu.'

Pengakuan Petrus

²⁷ Setelah itu Isa dan para pengikut-Nya pergi ke pekan-pekan di sekitar Kaisarea Filipi. Di tengah jalan Isa bertanya kepada mereka, 'Menurut orang, Aku ini siapa?'

²⁸ Mereka menjawab, 'Ada yang berkata, Yahya Pengimad; yang lain berkata, Ilyas; ada pula yang berkata, seorang daripada nabi.'

²⁹ 'Tetapi menurut kamu, Aku ini siapa?' tanya Isa. Petrus menjawab, 'Engkau ialah al-Masih.'

³⁰ Lalu Isa mengingatkan mereka supaya jangan memberitahu sesiapaapun tentang diri-Nya.

Isa memberitahu tentang kematian-Nya

³¹ Kemudian Isa mula mengajar mereka bahawa Putera Insan harus banyak menanggung kesengsaraan serta ditolak oleh para pemimpin masyarakat, ketua imam dan guru Taurat. Dia

akan dibunuh, tetapi tiga hari kemudian, Dia akan bangkit semula.

³² Isa mengatakan perkara ini dengan terusterang. Oleh itu, Petrus menarik Isa ke tepi dan menegur Dia.

³³ Isa berpaling memandang para pengikut-Nya lalu menegur Petrus, 'Pergilah dari sini, hai Iblis! Kamu tidak berfikir secara Allah, tetapi secara manusia.'

³⁴ Setelah itu Isa memanggil para pengikut-Nya dan orang ramai di situ lalu berkata kepada mereka, 'Jika seseorang hendak mengikut-Ku, dia harus melupakan kepentingan dirinya, memikul salib, dan mengikut-Ku.'

³⁵ Sesiapa yang mempertahankan hidupnya, akan kehilangan hidupnya. Tetapi sesiapa yang mengorbankan hidup untuk-Ku dan untuk Injil, akan menyelamatkan hidupnya itu.

³⁶ Apa gunanya jika seseorang memiliki seluruh dunia tetapi kehilangan hidupnya?

³⁷ Dapatkah hidup itu ditukar dengan apapun?

³⁸ Jika seseorang malu mengakui Aku dan perkataan-Ku di kalangan angkatan yang cabul dan berdosa ini, Putera Insan juga akan malu mengakuinya ketika Dia datang dalam kemuliaan Bapa-Nya diiringi para malaikat suci.'

9

¹ Isa berkata lagi, 'Sesungguhnya, ada beberapa orang di sini yang tidak akan mati sebelum melihat kerajaan Allah datang dengan kuasa.'

Penjelmaan

² Enam hari kemudian, Isa membawa Petrus, Yakobus, dan Yahya, pergi ke sebuah gunung yang tinggi di mana mereka bersendirian. Di situ Isa berubah rupa di depan mata mereka.

³ Pakaian-Nya menjadi putih berkilau-kilauan laksana salji, tiada siapa di bumi ini dapat memutihkan kain sehingga seputih itu.

⁴ Ilyas dan Musa muncul di hadapan mereka lalu berkata-kata dengan Isa.

⁵ Lalu Petrus berkata kepada Isa, 'Tuan Guru, baik sekali kami ada di sini. Biarlah kami dirikan tiga buah khemah - satu untuk-Mu, satu untuk Musa, dan satu untuk Ilyas.'

⁶ (Sebenarnya Petrus tidak tahu apa yang hendak dikatakannya, kerana ketiga-tiganya ketakutan.)

⁷ Segumpal awan datang menaungi mereka. Suatu suara terdengar dari dalam awan itu, 'Inilah Putera-Ku yang Kukasihi. Dengarlah kata-kata-Nya!'

⁸ Tiba-tiba, ketika mereka memandang sekeliling, mereka tidak lagi melihat sesiapa di situ bersama mereka, selain Isa.

⁹ Sewaktu berjalan turun dari gunung itu, Isa memperingatkan mereka supaya tidak memberitahu sesiapa segala yang telah mereka lihat, sehingga Putera Insan bangkit daripada kematian.

¹⁰ Mereka mentaati pesan itu, sambil tertanyanya apa maksud 'bangkit daripada kematian.'

¹¹ Mereka bertanya kepada Isa, 'Mengapa guru-guru Taurat berkata Ilyas mesti datang dulu?'

¹² Isa menjawab, 'Benar, Ilyas akan datang dulu dan memulihkan segala-galanya. Tetapi

bagaimana dengan apa yang tersurat tentang Putera Insan, bahawa Dia akan banyak menanggung penderitaan dan penghinaan?

¹³ Aku berkata kepadamu, Ilyas sudahpun datang dan orang memperlakukannya sesuka hati, tepat seperti yang tersurat tentang dirinya.'

Isa menyembuhkan seorang anak lelaki yang bisu

¹⁴ Apabila mereka pulang mendapatkan para pengikut yang lain, mereka melihat ramai orang di situ. Beberapa orang guru Taurat sedang bersoal jawab dengan para pengikut Isa.

¹⁵ Sebaik-baik orang ramai itu melihat Isa, mereka amat kagum lalu berlari menyambut-Nya.

¹⁶ Isa bertanya kepada para pengikut-Nya, 'Tentang apa kamu bersoal jawab dengan mereka?'

¹⁷ Seorang daripada orang ramai itu menjawab, 'Tuan Guru, aku membawa anakku kepada pengikut-pengikut-Mu. Anakku dirasuk oleh roh yang membuatnya bisu.

¹⁸ Apabila roh itu menyeranginya, dia menghempas-hempas tubuhnya ke tanah, mulutnya berbuih, giginya mengertak dan badannya menjadi kaku. Aku memohon pengikut-pengikut-Mu menghalau roh itu tetapi mereka tidak dapat melakukannya.'

¹⁹ Isa berkata kepada mereka, 'Hai angkatan yang tidak percaya! Berapa lamakah aku mesti tinggal bersamamu? Berapa lamakah aku harus bersabar denganmu? Bawa anak itu ke mari.'

²⁰ Mereka pun membawa anak itu kepada Isa. Sebaik-baik roh itu melihat Isa, ia pun membuat anak itu sawan, lalu jatuh berguling-guling ke tanah, mulutnya berbuih.

²¹ Isa bertanya kepada bapa anak itu, 'Sejak bila dia begini?' Bapa anak itu menjawab, 'Sejak dia kecil lagi.'

²² Sudah berkali-kali roh itu cuba membunuhnya dengan membuangnya ke dalam api atau air. Kasihanlah kami dan tolonglah kami, kalau Engkau dapat menolong.'

²³ Isa berkata kepadanya, 'Apa katamu? Kalau Engkau dapat? Segala sesuatu mungkin bagi orang yang percaya.'

²⁴ Bapa itu segera berseru, 'Aku percaya; tolonglah agar aku lebih percaya lagi!'

²⁵ Ketika Isa melihat orang ramai datang berkerumun, Dia memerintah roh durjana itu, 'Hai roh bisu tuli, Aku perintahkan kamu keluar daripada anak ini dan jangan memasukinya lagi.'

²⁶ Roh itu menjerit dan membuat tubuh anak itu terkejut-kejut, lalu keluar daripada anak itu. Anak itu kelihatan seperti mayat lalu semua orang berkata, 'Dia sudah mati.'

²⁷ Tetapi Isa memegang tangannya dan menolongnya bangun. Anak itu pun berdiri.

²⁸ Selepas itu Isa masuk ke rumah. Ketika tiada lagi orang lain di situ, para pengikut-Nya bertanya kepada-Nya, 'Mengapa kami tidak dapat menghalau roh itu?'

²⁹ Isa menjawab, 'Jenis ini tidak dapat dihalau dengan cara apapun, kecuali dengan doa.'

³⁰ Setelah itu Isa dan para pengikut-Nya beredar dari situ dan meneruskan perjalanan melalui Galilea. Dia tidak mahu orang tahu Dia di mana

³¹ kerana Dia sedang mengajar para pengikut-Nya. Dia berkata kepada mereka, 'Putera Insan akan diserahkan ke dalam tangan manusia dan akan dibunuh, tetapi selepas tiga hari Dia akan bangkit semula.'

³² Mereka tidak faham erti kata-kata itu tetapi takut hendak bertanya kepada Isa.

Siapa yang terbesar?

³³ Mereka tiba di Kapernaum. Setelah tiba di rumah, Isa bertanya kepada para pengikut-Nya, 'Apa yang kamu persoalkan di jalan tadi?'

³⁴ Mereka tidak menjawab, kerana dalam perjalanan mereka telah mempersoalkan siapa yang terbesar.

³⁵ Isa duduk lalu memanggil pengikut-Nya yang dua belas itu. Dia berkata kepada mereka, 'Kalau sesiapa ingin menjadi yang pertama, dia mestilah menjadi yang terakhir dan hamba kepada semua orang.'

³⁶ Selepas itu Dia memanggil seorang kanak-kanak dan menyuruhnya berdiri di hadapan mereka semua. Dia mendakap kanak-kanak itu sambil berkata kepada mereka,

³⁷ 'Sesiapa yang menerima kanak-kanak seperti ini kerana-Ku, menerima-Ku. Sesiapa yang menerima-Ku, menerima Allah yang mengutus-Ku.'

Menghalau roh iblis

³⁸ Yahya berkata kepada Isa, ‘Tuan Guru, kami melihat seorang lelaki menghalau roh-roh iblis dengan nama-Mu, lalu kami larang dia, kerana dia bukan dalam kumpulan kita.’

³⁹ Tetapi Isa berkata, ‘Jangan larang dia, kerana seseorang yang melakukan mukjizat dengan nama-Ku tidak mungkin mencela-Ku sejurus selepas itu.’

⁴⁰ Orang yang tidak menentang kita, memihak kepada kita.

⁴¹ Sesiapa yang memberimu secawan air dalam nama-Ku, kerana kamu pengikut al-Masih, sesungguhnya, Aku berkata kepadamu, dia pasti akan mendapat ganjarannya.

Menyebabkan orang lain berdosa

⁴² ‘Tetapi sesiapa yang menyebabkan seorang daripada kanak-kanak yang percaya kepada-Ku ini berdosa, maka lebih baiklah baginya jika batu kisar diikatkan ke lehernya dan dia dicampakkan ke dalam laut.’

⁴³ Jika tanganmu menyebabkan kamu berdosa, potonglah tangan itu! Lebih baik kamu memasuki hidup dalam keadaan kudung sebelah tangan, daripada mempunyai dua tangan tetapi terhurban ke neraka, ke dalam api yang tidak terpadam.

⁴⁴ Di sana cacingnya tidak akan mati dan apinya tidak akan padam.

⁴⁵ Jika kakimu menyebabkan kamu berdosa, potonglah kaki itu. Lebih baik kamu memasuki hidup dalam keadaan pincang, daripada memiliki dua kaki tetapi terhurban ke neraka.

⁴⁶ Di sana cacingnya tidak akan mati dan apinya tidak akan padam.

⁴⁷ 'Jika matamu menyebabkan kamu berdosa, cunckillah mata itu keluar. Lebih baik kamu memasuki kerajaan Allah dengan sebelah mata sahaja, daripada memiliki dua mata tetapi terhumban ke neraka.

⁴⁸ Di sana

“cacingnya tidak akan mati, dan apinya tidak akan padam.”

⁴⁹ 'Setiap orang akan disaluti api.

⁵⁰ 'Garam itu baik, tetapi jika hilang rasanya, bagaimana kamu dapat mengembalikan rasanya? Adakanlah garam pengukuh dalam dirimu, dan hiduplah rukun damai sesamamu.'

10

Perceraian

¹ Setelah itu Isa beredar dari situ lalu pergi ke daerah Yudea dan daerah di seberang Sungai Yordan. Ramai sekali orang yang datang kepada-Nya maka, seperti biasa, Dia pun mengajar mereka.

² Orang Farisi datang kepada-Nya untuk menduga-Nya. Mereka bertanya, 'Menurut hukum, bolehkah seseorang menceraikan isterinya?'

³ Dia menjawab, 'Apa yang diperintahkan oleh Musa kepadamu?'

⁴ Mereka berkata, 'Musa membenarkan seseorang lelaki menulis surat cerai dan menyingkirkan isterinya.'

⁵ Isa berkata, 'Disebabkan hati batu kamu, Musa menuliskan peraturan itu.

⁶ Tetapi sejak alam dicipta, Allah "telah menjadikan lelaki dan perempuan."

⁷ "Oleh itu seseorang lelaki harus meninggalkan ibu bapanya dan bersatu dengan isterinya,

⁸ dan mereka berdua akan menjadi satu," bukan lagi dua, tetapi satu.

⁹ Maka, apa yang telah disatukan oleh Allah, janganlah manusia memisahkan.'

¹⁰ Di dalam rumah, para pengikut-Nya bertanya lagi kepada-Nya tentang hal ini.

¹¹ Dia menjawab, 'Sesiapa yang menceraikan isterinya dan berkahwin dengan perempuan lain, melakukan zina.

¹² Begitu juga, jika seseorang wanita menceraikan suaminya dan berkahwin dengan lelaki lain, dia melakukan zina.'

Isa memberkati kanak-kanak

¹³ Selepas itu, orang membawa kanak-kanak kecil kepada-Nya supaya Dia menyentuh mereka, tetapi para pengikut-Nya memarahi mereka.

¹⁴ Tetapi apabila Isa melihat hal itu, Dia sungguh tidak menyenangnya, lalu berkata, 'Biarkan kanak-kanak kecil itu datang kepada-Ku, jangan larang mereka, kerana daripada yang seperti merekalah terdirinya kerajaan Allah.

¹⁵ Sesungguhnya, Aku berkata kepadamu, sesiapa yang tidak menerima kerajaan Allah seperti seorang anak kecil, pasti tidak akan memasukinya.'

¹⁶ Isa mendukung dan mendakap kanak-kanak kecil itu, meletakkan tangan-Nya pada mereka, dan memberkati mereka.

Orang yang kaya itu

¹⁷ Ketika Dia sedang melangkah ke jalan, seorang datang berlari-lari, berlutut kepada-Nya dan bertanya, 'Wahai Guru yang baik, apakah yang harus kulakukan untuk mewarisi hidup kekal?'

¹⁸ Isa berkata kepadanya, 'Mengapa kamu memanggil-Ku baik? Tiada siapa yang baik kecuali satu, iaitu Allah.

¹⁹ Kamu tahu perintah-perintah Allah: "Jangan berzina, jangan membunuh, jangan mencuri, jangan memberi kesaksian palsu, jangan menipu, hormati ibu bapamu." '

²⁰ Orang itu menjawab, 'Tuan Guru, semua ini telah aku taati dari usia muda lagi.'

²¹ Isa memandangnya dengan penuh kasih lalu berkata, 'Ada satu kekuranganmu. Pergilah, jual segala yang ada padamu, berikan hasil penjualannya kepada orang miskin, maka kamu akan mendapat harta di syurga. Sesudah itu datanglah dan ikut Aku.'

²² Tetapi orang itu sedih mendengar kata-kata ini lalu pergi dengan dukacita, kerana dia mempunyai banyak harta.

²³ Kemudian Isa memandang sekeliling dan berkata kepada para pengikut-Nya, 'Betapa susahnya bagi orang kaya untuk masuk ke dalam kerajaan Allah!'

²⁴ Para pengikut-Nya kehairanan mendengar kata-kata-Nya. Tetapi Isa berkata lagi, 'Anak-anakku, betapa susahnya untuk masuk ke dalam kerajaan Allah!

²⁵ Lebih mudah bagi seekor unta memasuki lubang jarum daripada seorang kaya memasuki kerajaan Allah.'

²⁶ Para pengikut-Nya merasa sungguh hairan, lalu berkata sama sendiri, 'Kalau begitu, siapa yang dapat diselamatkan?'

²⁷ Tetapi Isa memandang mereka lalu berkata, 'Bagi manusia hal itu mustahil, tetapi tidak bagi Allah, kerana bagi Allah segala-galanya dapat dilakukan.'

²⁸ Kemudian Petrus berkata kepada-Nya, 'Lihatlah, kami telah meninggalkan segala-galanya dan mengikut-Mu!'

²⁹ Isa menjawab, 'Sesungguhnya, Aku berkata kepadamu, setiap orang yang telah meninggalkan rumah, adik-beradik, ibu bapa, anak isteri, atau tanah untuk-Ku dan untuk Injil

³⁰ pasti akan menerima seratus kali ganda dalam dunia ini (rumah, adik beradik, ibu, anak-anak dan tanah - serta penganiayaan) dan pada kemudian hari, hidup kekal.

³¹ Tetapi ramai yang pertama akan menjadi terakhir, dan yang terakhir akan menjadi yang pertama.'

Isa memberitahu lagi tentang kematian-Nya

³² Ketika mereka di perjalanan, menuju ke Baitulmaqdis, dan Isa mendahului mereka, maka mereka sungguh takjub. Sambil mengikut-Nya,

mereka berasa takut. Kemudian Dia membawa pengikut-Nya yang dua belas itu ke samping lalu memberitahu mereka apa yang akan terjadi kepada-Nya.

³³ Kata-Nya, 'Kita sekarang pergi ke Baitul-maqdis. Putera Insan akan dikhianati dan diserahkan ke tangan ketua-ketua imam dan guru-guru Taurat. Mereka akan menjatuhkan hukuman mati kepada-Nya dan menyerahkan-Nya kepada orang bukan bani Israel.

³⁴ Mereka akan mengejek-Nya, menyebat-Nya, meludahi-Nya, dan membunuh-Nya. Pada hari ketiga Dia akan bangkit semula.'

Permintaan Yakobus dan Yahya

³⁵ Kemudian Yakobus dan Yahya, anak-anak Zebedeus, datang kepada-Nya lalu berkata, 'Tuan Guru, kami mahu Engkau membuat apa-apa yang kami minta untuk diri kami.'

³⁶ Isa bertanya kepada mereka, 'Apa yang kamu mahu Aku buat untukmu?'

³⁷ Mereka berkata kepada-Nya, 'Kurniailah kami duduk di kiri dan kanan-Mu dalam kemuliaan-Mu.'

³⁸ Tetapi Isa berkata kepada mereka, 'Kamu tidak tahu apa yang kamu minta. Sanggupkah kamu minum daripada cawan yang Kuminum, dan diimadkan dengan pengimadan yang Kuterima?'

³⁹ Mereka menjawab, 'Sanggup.'

Lalu Isa berkata kepada mereka, 'Memang kamu akan minum daripada cawan yang Kuminum dan diimadkan dengan pengimadan yang Kuterima.'

⁴⁰ Tetapi untuk duduk di kiri dan kanan-Ku bukanlah Aku memberikannya, tetapi bagi mereka yang tempat itu disediakan untuknya.'

⁴¹ Apabila pengikut yang sepuluh orang lagi itu mendengar hal itu, mereka marah akan Yakobus dan Yahya.

⁴² Tetapi Isa memanggil mereka kepada-Nya lalu berkata, 'Kamu tahu bahawa di kalangan orang bukan bani Israel, orang yang dianggap pemerintah memerintah rakyat dengan kuku besi, dan orang besar melaksanakan kekuasaan ke atas mereka.

⁴³ Ini tidak harus berlaku di kalanganmu. Sesiapa yang ingin menjadi orang besar di antaramu hendaklah melayani yang lain.

⁴⁴ Sesiapa yang ingin menduduki tempat pertama hendaklah menjadi hamba kepada semua,

⁴⁵ kerana Putera Insan juga datang bukan untuk dilayani tetapi untuk melayani, dan untuk menyerahkan nyawa-Nya sebagai tebusan bagi ramai orang.'

Isa menyembuhkan Bartimeus

⁴⁶ Setelah itu mereka tiba di Yerikho. Kemudian, ketika Dia keluar dari situ dengan para pengikut-Nya dan orang ramai itu, seorang buta bernama Bartimeus (anak Timeus), sedang duduk mengemis di tepi jalan.

⁴⁷ Ketika dia mendengar bahawa yang lalu itu Isa orang Nasaret, dia berteriak, 'Isa, Anak Daud, kasihanilah aku!'

⁴⁸ Ramai orang menyuruhnya diam, tetapi dia semakin berteriak, 'Anak Daud, kasihanilah aku!'

⁴⁹ Oleh itu Isa berhenti dan memberi perintah supaya dia dipanggil.

Mereka pun memanggil orang buta itu sambil berkata, 'Bergembiralah! Dan bangkitlah! Dia memanggilmu.'

⁵⁰ Orang buta itu mencampakkan jubahnya ke tepi lalu bangkit dan pergi kepada Isa.

⁵¹ Isa berkata kepadanya, 'Apa yang kamu mahu Kubuat untukmu?'

Orang itu menjawab, 'Tuan Guru, aku ingin melihat.'

⁵² Isa menjawab, 'Pergilah, imanmu telah menyembuhkanmu.' Serta-merta orang itu dapat melihat, lalu mengikut Isa dalam perjalanan-Nya.

11

Isa masuk ke Baitulmaqdis

¹ Apabila mereka sudah berhampiran Baitulmaqdis, di Baitfagi dan Baitani, di Bukit Zaitun, Isa mengutus dua orang pengikut-Nya,

² kata-Nya, 'Pergilah ke kampung yang setentang denganmu. Sebaik-baik kamu masuk, kamu akan mendapati seekor anak keldai yang belum pernah ditunggang, tertambat di situ. Lepaskannya dan bawa ke mari.

³ Jika sesiapa bertanya kepadamu, "Mengapa kau berbuat demikian?" katakan, "Junjungan memerlukannya, dan Dia akan segera memulangkannya." '

⁴ Mereka pun pergi dan mendapati anak keldai itu tertambat di pintu di tepi jalan, lalu mereka melepaskannya.

⁵ Beberapa orang yang berdiri di situ bertanya kepada mereka, 'Apa yang kamu buat, melepaskan anak keldai itu?'

⁶ Mereka menjawab seperti yang diperintahkan oleh Isa, lalu mereka dibenarkan pergi.

⁷ Mereka membawa anak keldai itu kepada Isa dan meletakkan jubah mereka di atas belakangnya. Isa pun duduk di atas belakang anak keldai itu.

⁸ Ramai orang membentangkan jubah mereka di atas jalan. Yang lain memotong dahan-dahan rimbun daripada pokok-pokok di situ dan meletakannya sepanjang jalan.

⁹ Setelah itu mereka yang berjalan di hadapan dan yang mengikut dari belakang berseru,

'Hosana!'

'Diberkatilah Dia yang datang
dengan nama Tuhan!'

¹⁰ 'Diberkatilah kerajaan bapa kita Daud!
Yang datang dengan nama Allah!'
'Hosana di tempat yang maha tinggi!'

¹¹ Isa masuk ke Baitulmaqdis dan terus masuk ke dalam rumah ibadat. Setelah Dia melihat semuanya, kerana hari sudah lewat petang, Dia pun pergi ke Baitani dengan pengikut-Nya yang dua belas itu.

Isa membersihkan rumah ibadat

¹² Esoknya, setelah mereka keluar dari Baitani, Isa berasa lapar.

¹³ Dari jauh Dia melihat sebatang pokok ara yang berdaun. Dia mendekatinya untuk melihat

kiranya pokok itu berbuah. Tetapi Dia mendapati daun sahaja di pokok itu, kerana pada masa itu bukan musim buah ara.

¹⁴ Oleh itu Isa berkata kepada pokok itu, 'Tiada siapa akan makan buahmu lagi selama-lamanya.' Para pengikut-Nya mendengar kata-kata itu.

¹⁵ Apabila sampai di Baitulmaqdis, Isa masuk ke rumah ibadat. Dia menghalau keluar orang yang berjual beli di dalam rumah ibadat, dan menterbalikkan meja para pengurup wang serta tempat duduk penjual burung merpati.

¹⁶ Dia tidak membenarkan siapapun mengangkat barangan melalui rumah ibadat.

¹⁷ Kemudian Dia mengajar mereka, kata-Nya, 'Tidakkah tersurat:

“Rumah-Ku akan dipanggil rumah doa bagi semua bangsa.”?

‘Tetapi kamu telah menjadikannya “sarang pencuri.”’

¹⁸ Guru-guru Taurat dan ketua-ketua imam mendengarnya lalu mencari jalan hendak membinasakan Isa, kerana mereka takut kepada-Nya, memandangkan semua orang mengagumi ajaran-Nya.

¹⁹ Setelah lewat petang, Isa keluar dari kota itu.

Isa mengutuk pohon ara

²⁰ Pada pagi esoknya, ketika mereka lalu di situ, mereka melihat pokok ara itu telah layu kering daripada akarnya.

²¹ Petrus teringat lalu berseru, ‘Tuan Guru, lihat! Pokok ara yang Engkau sumpah itu telah mati.’

²² Isa berkata kepada para pengikut-Nya, ‘Berimanlah kepada Allah.

²³ Sesungguhnya, Aku berkata kepadamu, jika sesiapa berkata kepada gunung, “Beralihlah dan terhumbanlah ke laut,” tanpa ragu dalam hatinya dan dengan sepenuh kepercayaan bahawa apa yang dikatakannya akan berlaku, maka akan terjadilah seperti kata-katanya itu.

²⁴ Oleh itu Aku berkata kepadamu, apa sahaja yang kamu minta ketika berdoa, percayalah kamu akan menerimanya, maka kamu akan mendapatnya.

²⁵ Setiap kali kamu berdoa, jika ada sesiapa yang bersalah terhadapmu, ampunilah dia, supaya Bapamu di syurga juga akan mengampunkan kesalahanmu.

²⁶ Tetapi jika kamu tidak mengampuni, Bapamu di syurga juga tidak akan mengampunkan kesalahanmu.’

Kekuasaan Isa dipersoalkan

²⁷ Selepas itu mereka masuk semula ke Baitulmaqdis. Sedang Dia berjalan di dalam rumah ibadat, ketua-ketua imam, guru-guru Taurat dan tua-tua datang kepada-Nya.

²⁸ Mereka berkata kepada-Nya, ‘Dengan kekuasaan apakah Kamu melakukan perkara-perkara ini? Siapa yang memberi-Mu kekuasaan untuk melakukannya?’

²⁹ Tetapi Isa menjawab, ‘Aku juga akan bertanya satu soalan kepadamu. Jawablah soalan-Ku, maka Aku akan memberitahumu dengan kekuasaan apa Aku melakukan perkara-perkara ini.

³⁰ Pengimadan Yahya – adakah daripada syurga atau daripada manusia? Jawablah soalan-Ku!’

³¹ Mereka berbincang sesama sendiri, ‘Kalau kita berkata, “Daripada syurga”, nanti kata-Nya, “Kalau begitu, mengapa kamu tidak percaya kepadanya?”

³² Tetapi, kalau kita berkata, “Daripada manusia”...’ (Mereka takut akan orang ramai itu yang semuanya menganggap Yahya seorang nabi.)

³³ Oleh itu mereka menjawab, ‘Kami tidak tahu.’

Lalu Isa berkata, ‘Aku pun tidak akan memberitahumu dengan kekuasaan apa Aku melakukan perkara-perkara ini.’

12

Ibarat tentang penyewa ladang

¹ Setelah itu Dia mula berkata-kata kepada mereka melalui ibarat: ‘Seorang peladang menanam anggur, memasang pagar sekeliling ladangnya, menggali lubang untuk tempat memeras anggur, dan membina menara tempat berkawal. Kemudian dia menyewakan ladang anggurnya kepada beberapa orang lalu pergi ke sebuah negeri yang jauh.

² Apabila tiba musim mengumpulkan hasil tanaman anggur, tuan punya ladang itu menghantar seorang hambanya untuk meminta bahagiannya daripada hasil itu.

³ Para penyewa ladang menangkap dan memukul hamba itu lalu menyuruhnya pergi dengan tangan kosong.

⁴ Tuan punya ladang menghantar seorang lagi hambanya. Mereka memukulnya, menyebabkannya luka di kepala dan menyuruhnya pergi setelah diperlakukan sebegitu kejinya.

⁵ Selepas itu tuan punya ladang menghantar seorang lagi hambanya, dan mereka membunuh hamba itu. Ramai lagi dihantar, ada yang dibunuh dan ada yang dipukul.

⁶ Oleh yang demikian, kerana dia masih ada seorang putera yang amat dikasihinya, dia menghantarnya sebagai utusan terakhir, sambil berkata dalam hatinya, “Mereka akan menghormati puteraku.”

⁷ “Tetapi para penyewa ladang berkata sesama sendiri, “Ini warisnya. Mari kita bunuh dia, supaya harta warisannya menjadi milik kita.”

⁸ Mereka pun menangkap dan membunuhnya lalu mencampakkannya ke luar ladang itu.

⁹ Jadi, apa yang akan dilakukan oleh tuan punya ladang anggur itu? Dia akan datang dan membinasakan para penyewa itu, lalu menyerahkan ladang anggur itu kepada orang lain.

¹⁰ Belum pernahkah kamu baca di dalam Kitab Suci:

“Batu yang dibuang oleh pembina telah menjadi batu penjuru;

11 Inilah perbuatan Allah, sungguh hebat di mata kami.” ’

12 Mereka ingin menangkap Isa tetapi takut akan orang ramai. Mereka tahu ibarat itu menyindir mereka. Mereka meninggalkan-Nya dan pergi dari situ.

Membayar cukai kepada Kaisar

13 Kemudian mereka menghantar kepada-Nya beberapa orang Farisi dan golongan Herodes, untuk memerangkap-Nya melalui kata-kata-Nya.

14 Orang yang dihantar itu berkata kepada-Nya, ‘Tuan Guru, kami tahu bahawa Engkau jujur, tidak peduli akan pendapat orang. Engkau tidak pilih kasih, hanya mengajar jalan Allah dengan mengatakan apa yang benar. Wajarkah kita membayar cukai kepada Kaisar Rom, atau tidak?’

15 Patutkah kami bayar, ataupun tidak?’

Tetapi Isa tahu bahawa mereka itu munafik lalu berkata, ‘Mengapa kamu menduga-Ku? Bawakan sekeping wang perak untuk Kulihat.’

16 Mereka pun membawakannya kepada Isa. Dia berkata kepada mereka, ‘Gambar dan nama siapakah ini?’

Mereka berkata kepada-Nya, ‘Kaisar.’

17 Isa memberikan jawapan, ‘Berikan milik Kaisar kepada Kaisar, dan milik Allah kepada Allah.’

Mereka kagum mendengar kata-kata-Nya.

Perkahwinan pada hari kebangkitan

18 Selepas itu beberapa orang Saduki, suatu golongan yang tidak mempercayai kebangkitan

manusia daripada kematian, datang kepada Isa lalu bertanya,

¹⁹ “Tuan Guru, Musa menulis untuk kami bahawa jika seseorang lelaki meninggal dunia tanpa anak, saudara lelakinya patutlah mengahwini balunya dan memanjangkan zuriatnya.

²⁰ Kesemuanya ada tujuh lelaki adik-beradik. Yang sulung beristeri, kemudian meninggal dunia tanpa anak.

²¹ Yang kedua berkahwin dengan balu saudaranya, kemudian meninggal dunia tanpa anak. Begitu juga yang ketiga.

²² Ketujuh-tujuhanya mengahwini wanita itu dan meninggal dunia tanpa mendapat anak. Akhirnya wanita itu juga meninggal dunia.

²³ Jadi, pada masa manusia bangkit daripada kematian, isteri siapakah wanita itu? Ketujuh-tujuhanya pernah mengahwininya.’

²⁴ Isa menjawab, “Tidakkah kamu tersilap, kerana kamu tidak memahami Kitab Suci mahupun kuasa Allah?”

²⁵ Apabila manusia bangkit daripada kematian, mereka tidak berkahwin atau dikahwinkan; mereka seperti malaikat di syurga.

²⁶ Tetapi tentang kebangkitan orang mati, tidakkah kamu baca dalam kitab Musa, bahagian tentang belukar yang bernyala, betapa Allah berfirman kepadanya, “Akulah Allah Tuhan Ibrahim, Ishak dan Yakub.”

²⁷ Dia bukanlah Allah Tuhan orang mati. Dia Allah Tuhan orang hidup. Oleh itu kamu tersilap sama sekali!’

Perintah yang terutama

²⁸ Seorang guru Taurat datang mendengar mereka bersoal jawab. Dia sedar bahawa Isa telah menjawab dengan baik. Dia pun bertanya kepada-Nya, 'Perintah manakah yang terutama?'

²⁹ Isa menjawab, 'Yang terutama antara semua perintah ialah: "Dengarlah, wahai umat Israel, Allah Tuhan kita, Tuhan kita adalah Esa.'

³⁰ Kamu hendaklah mengasihi Allah Tuhanmu dengan sepenuh hatimu, dengan sepenuh jiwamu, dengan sepenuh fikiranmu, dan dengan sepenuh kekuatanmu." Inilah perintah yang terutama.

³¹ Perintah yang kedua ialah: "Kamu hendaklah mengasihi sesama manusia seperti kamu mengasihi dirimu sendiri." Tiada perintah lain yang lebih utama daripada dua perintah ini.'

³² Guru Taurat itu berkata kepada Isa, 'Sungguh baik jawapan Tuan Guru. Kata-kata Engkau itu benar, kerana Allah itu Esa, tiada yang lain daripada-Nya.'

³³ Mengasihi-Nya dengan sepenuh hati, dengan sepenuh fikiran, dengan sepenuh jiwa, dan dengan sepenuh kekuatan, serta mengasihi sesama manusia seperti diri sendiri, adalah lebih utama daripada segala persembahan dan korban.'

³⁴ Isa sedar bahawa jawapan itu bijaksana, lalu berkata kepada guru Taurat itu, 'Kamu tidak jauh daripada kerajaan Allah.' Selepas itu tiada siapa yang berani menyoal-Nya.

Hubungan antara Isa dan Daud

³⁵ Kemudian, ketika mengajar di rumah ibadat, Isa berkata, 'Bagaimanakah guru-guru Taurat dapat mengatakan bahawa al-Masih itu anak Daud?'

³⁶ Kerana Daud sendiri berkata dengan pandangan Roh Suci:

‘“Tuhan berfirman kepada Junjunganku:

‘Duduklah di kanan-Ku
sehingga Kujadikan segala musuh-Mu
alas kaki-Mu.’”

³⁷ ‘Jadi, Daud sendiri memanggil-Nya “Junjunganku.” Bagaimana Dia boleh dianggap anak Daud?’

Orang ramai mendengar kata-kata Isa dengan sukacita.

³⁸ Dia mengajar mereka lagi, ‘Awas guru-guru Taurat, yang suka ke sana sini berjubah labuh, gembira diberi salam hormat di pasar-pasar,

³⁹ tempat duduk terbaik di saumaah dan di majlis jamuan.

⁴⁰ Mereka merampas rumah balu, kemudian pura-pura berdoa berjela-jela. Mereka ini akan menerima hukuman yang amat berat.’

Persembahan seorang balu

⁴¹ Isa duduk berhadapan dengan peti wang persembahan dan melihat betapa orang memasukkan wang ke dalamnya. Ramai orang kaya memasukkan sumbangan yang besar.

⁴² Kemudian seorang balu yang miskin memasukkan dua keping wang tembaga, yang sangat kecil nilainya.

⁴³ Isa memanggil para pengikut-Nya lalu berkata kepada mereka, ‘Sesungguhnya, Aku berkata kepadamu, balu yang miskin itu telah memberi lebih daripada semua orang yang telah memasukkan wang ke dalam peti persembahan;

⁴⁴ kerana mereka memberi daripada kekayaan mereka yang melimpah, tetapi dia daripada

kemiskinannya dan telah memasukkan semua yang ada padanya, seluruh rezekinya.’

13

Tanda-tanda akhir zaman

¹ Ketika Isa sedang melangkah keluar dari rumah ibadat, seorang pengikut-Nya berkata, ‘Tuan Guru, lihatlah batu dan bangunan yang luar biasa di sini!’

² Isa menjawab, ‘Adakah kamu melihat bangunan yang hebat-hebat ini? Tiada sekeping pun batunya akan tinggal tersusun, semuanya akan diruntuhkan.’

³ Ketika Dia duduk di atas Bukit Zaitun setentang dengan rumah ibadat, pengikut-Nya Petrus, Yakobus, Yahya dan Andreas bertanya kepada-Nya secara peribadi,

⁴ ‘Katakanlah kepada kami, bilakah hal-hal itu akan berlaku? Apakah tanda-tandanya semua ini akan terjadi seperti yang telah dikatakan?’

⁵ Isa menjawab, ‘Awas, jangan tertipu oleh sesi-
apapun.

⁶ Ramai yang akan datang dengan nama-Ku dan berkata, “Akulah Dia”, maka ramai yang akan terpedaya.

⁷ Apabila kamu mendengar berita atau khabar angin tentang peperangan, janganlah bimbang; kerana hal-hal begitu harus terjadi, tetapi belum sampai waktunya dunia berakhir.

⁸ Bangsa akan bangkit melawan bangsa, kerajaan melawan kerajaan. Gempa bumi akan berlaku di sana sini, dan juga kebuluran. Ini permulaan kesengsaraan.

⁹ ‘Berhati-hatilah tentang dirimu, kerana mereka akan mengheretmu ke hadapan majlis dan memukulmu di dalam rumah ibadat. Kamu akan dibawa kepada para pemerintah dan raja kerana-Ku, untuk memberikan kesaksian kepada mereka.

¹⁰ Injil mesti disebarakan terlebih dahulu kepada semua bangsa.

¹¹ Apabila mereka menangkapmu dan menyerahkanmu kepada pihak berkuasa, janganlah run-sing atau fikirkan apa yang akan kamu katakan. Tetapi apa yang diilhamkan kepadamu pada waktunya tuturkanlah, kerana yang bertutur itu Roh Suci, bukannya kamu.

¹² ‘Saudara akan mengkhianati saudara untuk dibunuh, demikian juga bapa akan anaknya. Anak-anak akan bangkit menentang ibu bapa dan menyebabkan mereka dihukum mati.

¹³ Kamu akan dibenci oleh semua orang kerana nama-Ku. Tetapi sesiapa yang bertahan hingga ke akhir akan diselamatkan.

¹⁴ ‘Apabila kamu melihat “kekejian yang membawa kebinasaan” yang disebutkan oleh Nabi Daniel berdiri di tempat terlarang baginya – hendaklah para pembaca memperhatikan ertinya – semua yang ada di Yudea larilah ke pergunungan.

¹⁵ Yang di atas bumbung ketika itu janganlah turun dan masuk ke rumah untuk mengambil apa-apa.

¹⁶ Yang di ladang usahlah pulang mengambil pakaian.

¹⁷ Malanglah ibu yang mengandung dan yang menyusui anak pada masa itu!

¹⁸ Berdoalah semoga hal-hal itu tidak terjadi pada musim dingin.

¹⁹ Pada masa itu akan berlaku pancaroba yang belum pernah wujud sejak dunia dicipta Allah hingga waktu itu dan tidak akan muncul lagi.

²⁰ Kalaulah Tuhan tidak menyingkatkan masa itu, tiada satu makhluk pun yang dapat diselamatkan. Namun, demi kesejahteraan mereka yang telah dipilih-Nya, masa itu disingkatkan-Nya.

²¹ Ketika itu jika sesiapa berkata kepadamu, “Lihat, al-Masih di sini!” atau “Lihat, Dia di sana!” janganlah kamu percaya;

²² kerana beberapa almasih palsu dan nabi palsu akan bangkit dan menunjukkan pelbagai tanda serta keajaiban untuk memperdaya orang, kalau boleh termasuk mereka yang telah dipilih Allah.

²³ Berhati-hatilah. Lihat, Aku telah memberitahu semuanya kepadamu terlebih dahulu.

²⁴ ‘Pada masa itu, selepas pancaroba,

“Matahari akan dikelamkan,
dan bulan tidak akan bersinar;

²⁵ bintang-bintang di langit akan gugur,
dan kuasa-kuasa angkasa akan digoncang.”

²⁶ ‘Kemudian mereka akan melihat Putera In-
san datang dalam awan penuh dengan kekuasaan
dan kemuliaan yang besar.

²⁷ Setelah itu Dia akan menghantar para
malaikat-Nya dan menghimpunkan orang
pilihan-Nya dari empat mata angin, dari hujung

bumi yang paling jauh ke hujung syurga yang paling jauh.

²⁸ 'Sekarang, kajilah ibarat daripada pokok ara: Apabila dahan-dahannya sudah lembut dan mengeluarkan daun, itulah tanda musim panas sudah dekat.

²⁹ Begitulah juga kamu. Apabila kamu melihat kejadian-kejadian ini, ketahuilah bahawa waktunya sudah dekat – sudah di ambang pintu!

³⁰ Sesungguhnya, Aku berkata kepadamu, angkatan ini tidak akan luput sebelum semua kejadian itu berlaku.

³¹ Langit dan bumi akan lenyap, tetapi kata-kata-Ku tidak akan lenyap.

Hari dan masa tidak diketahui

³² 'Tetapi tentang hari dan waktunya tiada siapa yang tahu. Malaikat di syurga tidak tahu, malah Putera juga tidak tahu, hanya Bapa yang mengetahu.

³³ Berhati-hatilah! Berjaga dan berdoa! Kerana kamu tidak tahu bila saatnya.

³⁴ Umpama seorang yang pergi ke negeri yang jauh: Dia meninggalkan rumahnya dan memberikan kekuasaan kepada hamba-hambanya, setiap seorang dengan tugasnya serta memerintahkan penjaga pintu supaya berjaga-jaga.

³⁵ 'Oleh itu berjagalah, kerana kamu tidak tahu bila tuan rumah akan pulang – pada waktu petang, atau tengah malam, ketika ayam berkokok, atau pada waktu pagi –

³⁶ takut kalau-kalau dia datang tiba-tiba dan mendapatimu sedang tidur.

³⁷ Apa yang Kukatakan kepadamu, Kukatakan kepada semua: “Berjagalah!”’

14

Isa diurapi

¹ Dua hari lagi akan tibalah perayaan Paska dan Jamuan Roti Tidak Beragi, ketua-ketua imam dan guru-guru Taurat mencari jalan untuk memerangkap Isa secara tipu daya dan menjatuhkan hukuman mati kepada-Nya.

² Tetapi mereka berkata, ‘Janganlah pada waktu perayaan, takut orang akan merusuh.’

³ Ketika itu Isa berada di Baitani di rumah Simon yang menghidap penyakit kusta. Sedang Isa duduk di meja, seorang wanita datang membawa bejana pualam berisi minyak narwastu murni yang amat mahal. Dia memecahkan bejana itu lalu menuangkan minyak itu ke atas kepala Isa.

⁴ Beberapa orang berkata-kata sesama sendiri dengan marah, ‘Mengapa dibazirkan minyak wangi ini?’

⁵ Minyak itu dapat dijual dengan harga lebih tiga ratus keping wang perak dan wangnya diberikan kepada orang miskin.’ Mereka mengecam wanita itu dengan kata-kata yang tajam.

⁶ Tetapi Isa berkata, ‘Biarkan dia. Mengapa kamu memarahinya? Dia telah melakukan sesuatu yang baik untuk-Ku.

⁷ Orang miskin akan sentiasa ada di kalanganmu, dan bila-bila sahaja kamu mahu, kamu dapat berbuat kebajikan kepada mereka. Tetapi Aku tidak akan sentiasa ada bersamamu.

⁸ Dia telah melakukan apa yang terdaya olehnya. Dia telah datang terlebih dahulu untuk menyediakan tubuhku bagi pengebumian.

⁹ Sesungguhnya, Aku berkata kepadamu, di mana-mana sahaja Injil ini disebarkan di serata dunia, apa yang telah dilakukan oleh wanita ini akan diceritakan juga sebagai kenangan kepadanya.'

¹⁰ Selepas itu Yudas Iskariot, seorang daripada pengikut Isa yang dua belas itu, pergi kepada ketua-ketua imam untuk mengkhianati-Nya dan menyerahkan-Nya kepada mereka.

¹¹ Ketika mendengar kata-katanya mereka pun sukacita dan berjanji akan memberinya wang. Sejak itu Yudas mencari jalan yang terbaik untuk mengkhianati Isa.

Perjamuan Tuhan

¹² Pada hari pertama Perayaan Roti Tidak Beragi, ketika mereka menyembelih anak domba Paska, para pengikut Isa berkata kepada-Nya, 'Di manakah Engkau mahu kami pergi menyediakan jamuan Paska untuk-Mu?'

¹³ Dia menghantar dua orang pengikut-Nya dan berkata kepada mereka, 'Pergilah ke dalam kota. Seorang lelaki yang membawa sekendi air akan menemui kamu. Ikutlah dia.

¹⁴ Di mana dia masuk, katakan kepada tuan rumah, "Tuan Guru berkata: Di manakah ruang tamu untuk Aku makan jamuan Paska dengan para pengikut-Ku?"

15 Dia akan menunjukkan kepadamu sebuah ruang besar di tingkat atas, lengkap dengan perabot dan telah siap disediakan. Di situlah kamu membuat persiapan untuk kita.'

16 Kedua-dua pengikut-Nya itu keluar, pergi ke dalam kota, dan mendapati segala-galanya tepat seperti yang telah dikatakan-Nya kepada mereka. Mereka pun menyediakan jamuan Paska.

17 Pada waktu lewat petang, Dia datang bersama para pengikut-Nya yang dua belas itu.

18 Sedang mereka duduk menikmati jamuan, Isa berkata, 'Sesungguhnya, Aku berkata kepadamu, seorang daripada kamu yang makan bersama-Ku akan mengkhianati-Ku.'

19 Mereka mula berdukacita. Seorang demi seorang berkata kepada-Nya, 'Akukah orang itu?'

20 Isa menjawab, 'Dia seorang daripada yang dua belas yang mencecah roti bersama ke dalam bekas.'

21 Putera Insan memang mesti pergi, seperti yang tersurat tentang-Nya. Tetapi malanglah orang yang mengkhianati Putera Insan! Lebih baiklah baginya jika dia tidak dilahirkan ke dunia ini.'

22 Sedang mereka makan, Isa mengambil roti lalu memberkatinya dan kemudian membahagikannya kepada mereka dan berkata, 'Ambil, makanlah, ini tubuh-Ku.'

23 Kemudian dia mengambil cawan air anggur, dan selepas mengucap syukur, Dia memberikannya kepada mereka, lalu mereka semua minum darinya.

24 Dia berkata kepada mereka, 'Ini darah-Ku bagi perjanjian baru, ditumpahkan untuk beberapa ramai manusia.

25 Sesungguhnya, Aku berkata kepadamu, Aku tidak akan minum air anggur lagi hingga Aku minum yang baru dalam kerajaan Allah.'

26 Setelah menyanyikan sebuah lagu suci, mereka keluar ke Bukit Zaitun.

Petrus akan menyangkal Isa

27 Isa berkata kepada mereka, 'Malam ini, iman kamu semua akan goyah kerana-Ku, seperti yang tersurat:

“‘Aku akan merebahkan Gembala, dan kawanannya akan bertempieran.’”

28 'Tetapi setelah Aku dibangkitkan semula, Aku akan mendahuluiimu pergi ke Galilea.'

29 Petrus berkata kepadanya, 'Kalaupun semua yang lain goyah imannya, aku tidak akan goyah.'

30 Isa berkata kepadanya, 'Sesungguhnya, Aku berkata kepadamu, pada malam ini sebelum ayam berkokok dua kali, kamu akan menyangkal-Ku tiga kali.'

31 Tetapi Petrus berkata dengan lebih tegas lagi, 'Kalaupun aku terpaksa mati bersama-Mu, aku tidak akan menyangkal-Mu.' Semua yang lain pun berkata demikian.

Isa di Getsemani

32 Mereka sampai di suatu tempat yang dinamakan Getsemani. Isa berkata kepada para

pengikut-Nya, 'Duduklah di sini sementara Aku berdoa.'

³³ Dia membawa Petrus, Yakobus dan Yahya bersama-Nya, dan Dia mula berasa gundah dan amat terseksa.

³⁴ Dia berkata kepada mereka, 'Jiwa-Ku sungguh dukacita, bagaikan mati. Duduklah di sini, dan berjagalah.'

³⁵ Dia pergi jauh sedikit lagi, lalu sujud di tanah, dan berdoa kiranya dapat semoga saat itu diedarkan daripada-Nya.

³⁶ Kata-Nya, 'Abba, Bapa, segala-galanya dapat Kaulakukan. Edarkanlah cawan ini daripada-Ku. Namun, berlakulah kehendak-Mu, bukan kehendak-Ku.'

³⁷ Kemudian dia kembali kepada pengikut-pengikut-Nya dan mendapati mereka sedang tidur, lalu Dia berkata kepada Petrus, 'Simon, kamu tidur? Satu jam pun kamu tidak dapat berjaga?'

³⁸ Berjaga dan berdoalah, takut nanti kamu tergod. Memang rohani rela, tetapi jasmani lemah.'

³⁹ Dia pergi berdoa lagi, dengan kata-kata yang sama.

⁴⁰ Apabila Dia kembali, didapati-Nya mereka telah tertidur lagi, kerana mata mereka amat mengantuk. Mereka tidak tahu apa yang hendak dijawab kepada-Nya.

⁴¹ Setelah Dia datang kepada mereka bagi kali ketiga, Dia berkata, 'Adakah kamu masih tidur dan berehat? Cukuplah! Waktunya sudah tiba. Lihat, Putera Insan sedang dikhianati dan diserahkan ke tangan orang berdosa.'

42 Bangunlah! Mari kita pergi! Lihat, pengkhianat-Ku sudah tiba!

Isa ditangkap

43 Sesaat kemudian, ketika Dia masih berkata-kata, seorang daripada pengikut-Nya yang dua belas itu iaitu Yudas datang dengan orang yang sangat ramai dan bersenjatakan pedang serta belantan. Mereka datang daripada ketua-ketua imam, guru-guru Taurat dan tua-tua.

44 Pengkhianat Isa telah menetapkan satu isyarat dengan mereka: 'Sesiapa yang kucium, itulah Dia. Tangkap Dia dan bawalah Dia pergi dengan selamat.'

45 Sebaik-baik Yudas tiba, dia pergi kepada Isa sambil berkata, 'Tuan Guru!' lalu mencium-Nya.

46 Mereka pun menangkap-Nya dan membawa-Nya pergi.

47 Seorang daripada yang berdiri di situ menghunus pedangnya lalu menetak hamba Imam Besar, sehingga terputus telinganya.

48 Isa berkata kepada mereka, 'Patutkah kamu datang bagaikan hendak menangkap perompak, dengan pedang dan belantan, untuk membawa-Ku pergi?'

49 Setiap hari Aku di kalanganmu, mengajar di rumah ibadat, tidak kamu tangkap. Tetapi yang tersurat di dalam Kitab Suci mesti berlaku.'

50 Setelah itu semua pengikut Isa meninggalkan-Nya dan melarikan diri masing-masing.

⁵¹ Seorang pemuda mengikut-Nya, dengan hanya sehelai kain linen membalut tubuhnya. Pemuda-pemuda lain menangkapnya,

⁵² lalu dia melucutkan kain linen itu dan melarikan diri daripada mereka dalam keadaan telanjang.

Isa di hadapan Majlis Agama

⁵³ Isa dibawa kepada Imam Besar. Bersamanya berhimpun semua ketua imam, tua-tua, dan guru-guru Taurat.

⁵⁴ Petrus mengikut Isa dari jauh, turut masuk ke laman dalam rumah Imam Besar, dan duduk di kalangan hamba-hamba, berdiang di situ.

⁵⁵ Ketua-ketua imam dan semua ahli Majlis Agama berusaha mencari kesaksian untuk mendakwa Isa, tetapi tidak berjaya.

⁵⁶ Ramai yang memberi kesaksian palsu terhadap-Nya, tetapi kesaksian mereka semua bercanggah.

⁵⁷ Kemudian beberapa orang bangkit memberi kesaksian palsu terhadap-Nya dengan berkata,

⁵⁸ ‘Kami telah mendengar Dia berkata, “Aku akan membinasakan rumah ibadat yang diperbuat dengan tangan ini, dan dalam tiga hari Aku akan membina rumah ibadat yang diperbuat tanpa tangan.” ’

⁵⁹ Tetapi kesaksian mereka masih bercanggah.

⁶⁰ Imam Besar bangkit berdiri di tengah-tengah kesaksian itu lalu bertanya kepada Isa, ‘Tidakkah Kamu mahu menjawab apa-apa? Apakah yang disaksikan oleh mereka ini terhadap-Mu?’

⁶¹ Tetapi Isa berdiam diri, tidak menjawab sepetah pun.

Imam Besar itu bertanya lagi kepada-Nya, 'Adakah Kamu al-Masih, Putera Allah Maha Suci?'

⁶² Isa menjawab, 'Ya, Akulah Dia. Kamu akan melihat Putera Insan duduk di kanan Allah Maha Kuasa, dan datang dengan awan syurga.'

⁶³ Imam Besar lalu mengoyak-ngoyakkan pakaiannya sambil berkata, 'Adakah kita perlukan saksi lagi?'

⁶⁴ Kamu telah mendengar kata-kata kufur-Nya sendiri! Apakah pendapatmu?'

Lalu mereka semua menjatuhkan hukum ke atas-Nya, bahawa Dia patut dibunuh.

⁶⁵ Kemudian sesetengah mereka mulai meludahi-Nya, membalut mata-Nya lalu memukul-Nya dan berkata kepada-Nya, 'Bernubuatlah!' Pengawal-pengawal pula menampar-Nya.

Petrus menyangkal Isa

⁶⁶ Petrus ada di bawah, di laman dalam. Seorang hamba perempuan Imam Besar datang ke situ.

⁶⁷ Apabila dia melihat Petrus sedang berdiang memanaskan tubuhnya, dia memandang Petrus dan berkata, 'Kamu juga bersama Isa orang Nasaret.'

⁶⁸ Petrus menyangkal, katanya, 'Aku tidak tahu dan tidak faham apa yang kaukatakan.' Dia keluar ke serambi depan, lalu ayam berkokok.

⁶⁹ Hamba perempuan itu melihatnya lagi, lalu mula berkata kepada orang yang berdiri di situ, 'Ini seorang daripada mereka.'

⁷⁰ Petrus menyangkalnya lagi.

Sejurus kemudian, mereka yang berdiri di situ berkata pula kepada Petrus, 'Tentu sekali kamu seorang daripada mereka, kerana kamu orang Galilea. Ini nyata daripada cara percakapanmu.'

⁷¹ Petrus mengucapkan kutuk dan sumpah, 'Aku tidak kenal orang yang kaukatakan itu!'

⁷² Ayam pun berkokok bagi kali kedua. Lalu Petrus teringat kata-kata Isa kepadanya: 'Sebelum ayam berkokok dua kali, kamu akan menyangkal-Ku tiga kali.' Memikirkan perkara itu, Petrus menangis.

15

Isa di hadapan Pilatus

¹ Awal-awal pagi lagi ketua-ketua imam segera bermesyuarat dengan para tua-tua, guru Taurat dan seluruh Majlis Agama. Kemudian mereka mengikat Isa, membawa-Nya pergi dan menyerahkan-Nya kepada Pilatus.

² Pilatus bertanya kepada-Nya, 'Adakah Kamu Raja orang Yahudi?' Isa menjawab, 'Begitulah seperti katamu.'

³ Kemudian ketua-ketua imam melemparkan pelbagai tuduhan terhadap-Nya.

⁴ Pilatus bertanya lagi kepada-Nya, 'Tidakkah Engkau mahu menjawab apa-apa? Lihat betapa banyaknya tuduhan mereka terhadap-Mu?'

⁵ Tetapi Isa masih tidak menjawab sepeatah pun, sehingga Pilatus kehairanan.

⁶ Pada waktu perayaan, lazimnya Pilatus membebaskan seorang banduan dari penjara, iaitu sesiapa yang diminta oleh mereka.

⁷ Ada seorang bernama Barabas yang dirantaikan bersama beberapa orang pemberontak lain. Mereka telah melakukan pembunuhan dalam pemberontakan itu.

⁸ Orang ramai mula berseru lantang meminta Pilatus membebaskan seorang daripada penjara seperti yang biasa dilakukannya.

⁹ Pilatus bertanya, 'Adakah kamu mahu aku membebaskan kepadamu Raja orang Yahudi?'

¹⁰ kerana dia tahu bahawa ketua-ketua imam telah menyerahkan Isa kepadanya kerana iri hati.

¹¹ Tetapi ketua-ketua imam menghasut orang ramai supaya meminta Barabas dibebaskan kepada mereka.

¹² Pilatus berkata kepada mereka, 'Kalau begitu, apa yang kamu mahu kulakukan kepada Dia yang kamu panggil Raja orang Yahudi?'

¹³ Mereka berseru lagi dengan kuatnya, 'Salibkan Dia!'

¹⁴ Kata Pilatus kepada mereka, 'Mengapa? Apakah kejahatan yang telah dilakukan-Nya?'

Tetapi mereka semakin kuat berseru, 'Salibkan Dia!'

¹⁵ Oleh itu, untuk memuaskan hati orang ramai itu, Pilatus membebaskan Barabas kepada mereka. Setelah menyebat Isa, dia menyerahkan-Nya untuk disalib.

Isa dipermainkan

16 Kemudian para askar membawa-Nya ke depan yang dipanggil Praetorium, lalu menghimpunkan seluruh pasukan tentera yang ada di situ.

17 Mereka mengenakan pakaian berwarna ungu pada tubuh-Nya, dan membuat mahkota daripada duri lalu meletakkannya di atas kepala-Nya.

18 Kemudian mereka menyindir-Nya, 'Daulat Tuanku, Raja orang Yahudi!'

19 Mereka memukul kepala-Nya dengan mensiang, meludahi-Nya, kemudian tunduk menyembah-Nya.

20 Setelah mempermain-mainkan-Nya, mereka melucutkan pakaian ungu itu dan mengenakan semula pakaian-Nya. Lalu mereka membawa-Nya untuk disalib.

Isa disalib

21 Ketika itu seorang yang bernama Simon, orang Kirene, bapa kepada Iskandar dan Rufus sedang lalu di situ. Dia baru sahaja datang dari luar bandar. Kemudian mereka memaksanya mengangkat salib Isa.

22 Mereka membawa-Nya ke tempat yang dipanggil Golgota (bermaksud Tempat Tengkorak).

23 Kemudian mereka memberi-Nya air anggur bercampur mur tetapi Dia enggan meminumnya.

24 Setelah mereka menyalib-Nya, mereka membahagikan pakaian-Nya antara mereka dengan membuang undi.

25 Mereka menyalib-Nya pada pukul sembilan pagi.

²⁶ Tuduhan terhadap-Nya tertulis di atas: RAJA ORANG YAHUDI.

²⁷ Mereka menyalib dua orang perompak bersama Isa, seorang di kanan dan seorang lagi di kiri-Nya.

²⁸ Dengan demikian berlakulah apa yang ter-surat di dalam Kitab Suci: 'Dan Dia digolongkan dengan penjahat.'

²⁹ Semua orang yang lalu di situ menggeleng-gelengkan kepala sambil mengejek Isa. Mereka berkata, 'Kamu mahu memusnahkan rumah ibadat dan membinanya semula dalam tiga hari!

³⁰ Sekarang turunlah dari salib itu dan selamatkanlah diri-Mu!

³¹ Ketua-ketua imam dan guru-guru Taurat juga mempermainkan Isa. Mereka berkata sesama sendiri, 'Dia menyelamatkan orang, tetapi tidak dapat menyelamatkan diri-Nya sendiri!

³² Kiranya Dia Raja orang Yahudi dan al-Masih, turunlah dari salib, supaya kami melihat dan percaya kepada-Nya!' Orang yang disalib bersama Isa pun mencela-Nya.

Kematian Isa

³³ Pada tengah hari, selama tiga jam, seluruh negeri itu gelap-gelita.

³⁴ Pada pukul tiga petang, Isa berseru dengan suara lantang, '*Eloi, Eloi, lama sabakhtani?*' Ertinya, 'Ya Allah, Ya Tuhan-Ku, mengapa Kautinggalkan Aku?'

³⁵ Beberapa orang di situ mendengar seruan itu dan berkata, 'Dengarlah, Dia memanggil Ilyas.'

³⁶ Seorang daripada mereka berlari mengambil span lalu mencelupnya ke dalam air anggur

murah. Kemudian dia mencucukkan span itu di hujung sebatang mensiang dan menawarkannya kepada Isa untuk minum, sambil berkata, 'Kita menunggu, kalau-kalau Ilyas datang menurunkan-Nya dari salib.'

³⁷ Isa berteriak dengan kuat lalu menghembuskan nafas terakhir.

³⁸ Sejurus kemudian, tirai di dalam rumah ibadat terbelah dua, dari atas hingga ke bawah.

³⁹ Ketua tentera yang berdiri di hadapan salib itu melihat semua ini lalu berkata, 'Benarlah Dia Putera Allah!'

⁴⁰ Beberapa orang wanita menyaksikan segalanya dari jauh. Antara mereka ialah Salome, Maryam Magdalena, serta Maryam ibu Yakobus Muda dan Yoses.

⁴¹ Mereka wanita-wanita yang mengikut dan menolong Isa ketika Dia di Galilea. Ada ramai juga wanita yang datang dengan Isa ke Baitulmaqdis.

Isa dimakamkan

⁴² Hari sudah lewat petang. Hari itu Hari Perseediaan, iaitu sehari sebelum hari Sabat.

⁴³ Yusuf dari Arimatea, seorang ahli terkemuka Majlis Agama yang sedang menunggu kerajaan Allah, datang lalu memberanikan hatinya menghadap Pilatus dan memohon untuk mengambil jenazah Isa.

⁴⁴ Pilatus hairan mendengar Isa sudahpun meninggal dunia, lalu memanggil ketua tentera dan bertanya sama ada Isa sudah meninggal.

⁴⁵ Setelah mendengar laporan ketua tentera itu, dia pun menyerahkan jenazah Isa kepada Yusuf.

⁴⁶ Yusuf membeli kain linen yang baik, menu-runkan jenazah Isa dan mengkafkannya dengan kain itu. Dia membaringkan jenazah itu di dalam sebuah makam yang telah digali di permukaan batu pejal, lalu menggulingkan sebuah batu besar menutup pintu makam itu.

⁴⁷ Maryam Magdalena dan Maryam ibu Yoses memerhatikan tempat makam itu.

16

Kebangkitan Isa

¹ Setelah tamat hari Sabat, Maryam Magdalena, Maryam ibu Yakobus, dan Salome membeli ramuan rempah untuk melumuri jenazah Isa.

² Pada awal pagi hari pertama minggu itu, mereka sampai di makam itu ketika matahari terbit.

³ Mereka berkata-kata sesama sendiri, 'Siapa yang akan menggulingkan batu daripada pintu makam untuk kita?'

⁴ Apabila mereka memandang makam itu, mereka mendapati batu yang sangat besar itu telahpun digulingkan.

⁵ Mereka masuk ke dalam makam itu dan melihat seorang pemuda berjubah putih sedang duduk di sebelah kanan; mereka sungguh terkejut dan ketakutan.

⁶ Tetapi dia berkata kepada mereka, 'Jangan takut. Kamu mencari Isa orang Nasaret, yang telah disalib. Dia telah bangkit semula! Dia tidak ada di sini. Lihatlah tempat mereka baringkan jenazah-Nya.'

⁷ Tetapi, pergilah, beritahu para pengikut-Nya, termasuk Petrus, bahawa Dia mendahuluiimu ke Galilea. Di sana kamu akan melihat-Nya, seperti yang telah dikatakan-Nya kepada kamu.'

⁸ Mereka pun segera keluar dan berlari meninggalkan makam itu, kerana mereka gementar dan kehairanan. Mereka tidak berkata apa-apa kepada sesiapa, kerana mereka takut.

Isa menampakkan diri kepada pengikut-Nya.

⁹ Setelah Isa bangkit semula pada awal pagi hari pertama minggu itu, pertama sekali Dia menampakkan diri-Nya kepada Maryam Magdalena yang telah disembuhkan-Nya daripada dirasuk tujuh roh iblis dahulu.

¹⁰ Maryam pun pergi memberitahu para pengikut-Nya yang sedang berkabung dan menangis.

¹¹ Ketika mendengar bahawa Isa hidup dan telah dilihat oleh Maryam, mereka tidak percaya.

¹² Selepas itu, Dia menampakkan diri dengan cara lain kepada dua orang daripada mereka ketika mereka sedang berjalan ke desa.

¹³ Kedua-dua orang pengikut Isa itu segera pergi memberitahu yang lain, tetapi mereka juga tidak percaya.

¹⁴ Kemudian Dia menampakkan diri kepada kesemua pengikut-Nya yang sebelas itu ketika mereka sedang makan. Dia menegur sikap mereka yang tidak percaya dan keras hati, kerana mereka tidak mempercayai orang yang telah melihat-Nya setelah Dia bangkit semula.

¹⁵ Dia berkata kepada mereka, 'Pergilah ke serata dunia dan sebarkan Injil kepada setiap insan.

¹⁶ Sesiapa yang percaya dan diimadkan akan diselamatkan, tetapi sesiapa yang tidak percaya akan dihukum.

¹⁷ Tanda-tanda ini akan menyertai mereka yang percaya: Dengan nama-Ku mereka akan menghalau roh-roh iblis, dan mereka akan bertutur dengan bahasa-bahasa baru.

¹⁸ Mereka akan memegang ular tanpa mudarat. Kiranya mereka terminum racun, mereka tetap selamat. Mereka akan meletakkan tangan pada orang sakit dan orang itu akan sembuh.'

¹⁹ Setelah Junjungan Isa berkata-kata dengan mereka, Dia disambut naik ke syurga lalu duduk di kanan Allah.

²⁰ Para pengikut-Nya pergi mengajar di serata dunia. Tuhan bekerja bersama mereka, mengesahkan firman dengan iringan tanda-tanda ajaib.

Kitab Suci Zabur dan Injil
Contextualized New Testament in the Malay language
of Malaysia.

Copyright © 2013 Pengamat Kitab Mulia

Language: Bahasa Malaysia (Malay)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-01

PDF generated using Haiola and XeLaTeX on 18 Apr 2025 from source files dated 31 Aug 2023

648b665b-0b0d-5152-8152-17df023a0827